

山西通志

册八十六

山西通志卷第一百五十九

山西巡撫都察院右副都御史 臣 覺羅石麟奉

旨修輯

仙釋一

唐永樂純陽呂氏為苦縣學南北宗之祖遼廣陵海蟾劉氏為南宗之祖晉雁門釋慧遠淨土宗又為舍衛學內學外學之宗此胥傳記可覈者也而要其宜錄者固不止此錄之以續後魏史靈徵元史釋老之後焉志仙釋

太原府

夏

嘯父冀州人少在西州市上補履見漢劉向列仙傳師門者嘯父弟子為夏孔甲龍師見劉向列仙傳

山西通志 卷一百五十九
務光夏時人見劉向列仙傳

三國

郝姑字女君太原人徙居莫縣魏青龍間與隣女十人於漚
洩水邊挑蔬忽有三青衣童子至前云東海公娶女君
爲婦言訖敷茵褥水上行坐往來如陸地其青衣童子侍
側沿流而下隣女走告家人往看女君遙語幸得爲水仙
願勿憂怖又云至四月送刀魚爲信四月果多刀魚鄉人
於是月祈禱州縣長吏入祠先拜然後得入祠前忽生青
白石一塊縱橫可三尺高二丈餘舊題云上馬石今尚存
尹軌字公度太原人見晉葛洪神仙傳

甘始太原人見葛洪神仙傳
北齊

由吾道榮少好道法聞晉陽人大明法術乃尋之是人爲人
家傭力無名者久求訪始得其人道家符水禁咒陰陽曆
數天文藥性無不通解以道榮好尚乃悉授之歲餘是人
謂榮云我本恒岳仙人有少罪過爲天官所謫今限滿將
歸卿宜送吾至汾水及至汾河遇水暴長橋壞船渡艱難
是人乃臨水禹步以一符投水中流便絕俄頃水積將至
天是人徐自沙石上渡惟道榮見之旁人咸云水長如此
此人遂能浮過共驚異之道榮仍歸隱瑯琊山顯祖尋追
往晉陽後至隋初卒

唐

趙龜頤嵐縣人開元間爲紫極宮道童不茹葷酒惟喜靜坐
衣破衲食藜藿一日曝粟於庭有一大鳥來食粟以杖逐

山西通志 卷一百五十九 二
之去復來凡三旣而依戀於頤膝下乃悟爲鶴乘之遂飛
集松頂似有物墜城西高阜人視之乃前所衣衲也號其
地爲脫衣坡越明年坡生桃一葩殊奇胥傳爲仙跡云
張世寧太原人見宋曾慥集仙傳

元

宋德方號披雲子隱居太原昊天觀鑿石洞七龕爲修煉所
有石刻像自作贊今存至元七年贈元通披雲真人仍將
雲州金閣山雲溪觀賜號曰崇真鑄石陽曲之元通觀
杜志元陽曲百井人童稚嬉戲未嘗忤物甫冠遇一相者曰
此子仙風道骨塵俗汚染下手已遲志元悟遂禮代州神
崗觀張廣元爲師七年默有所得遍遊名山晚始歸里構
西溪菴居之知未來事朗如明鏡至元十五年按察使史

杠撰記

李志朴字純甫質實勤幹建陽曲卿雲觀其徒張居敬嗣之
領悟師傳沉潛至道至元癸巳授天下元門演道大宗師
掌教真人

陶志頤榆次人號隱真子幼從張真人學道授以修真煉性
術遊燕與棲霞真人王公叅究元妙有疑輒印證之歸棲
邑之萬春宮年九十羽化

洞明真人姓祁氏至元三十一年贈存神應化洞明真人鑄
石陽曲元通觀

明

陸本雲間人弘治末居太原昊天觀石洞中有道術能符水
禱雨輒應袖核於山頂搖之雷聲輒隱起後遊華山莫知

山西通志
卷一百五十一
三
所終

國朝

潘守器字鼎持湖州人年二十餘出家遇異人授導引內鍊諸術適晉寓陽曲栢樹園純陽宮去而復來者三閉關靜室累月不食神彌旺康熙己亥白雲觀主王某以守器薦撫臣送入都乞還山年九十有九卒塑遺蛻於純陽宮之西廊以上仙

北齊

阿禿師晉陽沙門乍愚乍智時人呼爲阿禿師齊文宣少時與諸童共見之歷問祿位至帝舉手再三指天而已口無所言衆咸異之

祥雲并州周氏子童年依州僧統靈詢披剃讀涅槃經不期年成誦日持一遍遊清涼棲止太孚寺一日見數官服者延至巨宅雲問之對曰我山神也慕師道行故特奉扳行道七日圓滿神具珍奇爲贈雲固却不受神卽取藥一莖色如白玉以貽雲餌之遂獲仙還經詢所禮謝不知所終

隋

空王佛陝之馮翊人也其先出太原榆次縣源渦里俗姓田名志超方孩卽喜禮佛年十七父母爲擇娶不納削髮雲遊至五臺一老人點示曰後當佛矣洞明心地回至介休華巖寺講經修行復遷縣西滾鐘寺侍者摩斯供厨夜感一白兔用鐘取水日供不竭後入綿山仙窟有五龍出聽法懸巖巉峭飛渡而過白鹿白兔競前導至抱腹巖中禪定崖開金字摩斯受記有青衣童子奉古佛舍利供養貞

山西通志 卷一百五十九 四
觀初亢旱太宗禱雨不應占曰勝地仙居禪人處祈長安
父老向名山尋禱及禪師師令拜侍者摩斯斯方淘米以
米汁向西少洒令急回曰今日長安已霑足矣果應太宗
乃詔禪師入長安不就知必復詔冥目而化御駕果至巖
麓興國寺知其已化鑿輿乃迴衆詣巖行禮時山昏霧條
開見金字牌云空王古佛太宗乃賜空王佛號詔塑金容
改興國寺名回鑿後旱禱輒應

高節并州人年十七辭親入臺山至北臺谷後見頭陀苦茅
爲居節長跪求度僧曰能食我食乃可度節卽採葉而食
汲泉而飲居數日僧曰能誦法華乃可度七日法華成誦
僧曰汝能攝念坐七日必當得度節坐七日起長跪僧曰
我年髦矣不能令汝成道今長安有臥輪禪師可往依之

且曰我海雲比丘也節謁輪公輪問所從來節曰奉海雲
比丘命自五臺來輪大驚曰海雲卽華嚴經中善財所叅
第三知識也節辭輪而返復履舊境惟見荒麓焉

唐

智滿太原奉聖寺開山師也鄂國公尉遲敬德禮智滿云割
絕他命敢問還否師云將軍悔心天啓之也若齋僧建刹
何如曰一念善心生獲福無涯淡敬德稽顙拜施別業爲
梵宇高祖賜額十方奉聖禪寺延智滿居之見元王居實
記

哲法師太原人則天臨朝屢徵不起開元間示化於福聚寺
道綽姓衛氏并州文水人著淨土論二卷見唐藝文志
宋

閻趙二僧居太常寺太宗下河東時施棗賞軍給數千人未
下罈口後證涅槃於寺

法濟榆次人俗姓卜初禮五臺秀公和尚爲師號麻衣和尚
天聖初臥化縣之紫巖寺

明因大師道詮姓衛氏并州文水人始爲童子辭家入洛陽
妙覺禪院依真行大師惠璿學浮圖法咸平五年入僧籍
後二十四年賜紫衣遂主寺衆又四年賜號明因兼領右
街教門事壽五十有三明道癸酉正月卒歐陽修撰塔記
諸仙禪師俗姓裴祁縣人居幽仙寺一日午夢覺云河南好
麥時三月中旬也徒衆皆竊笑師乃出麥穗袖中示之衆
大異嘗入汴徽宗詔入朝賜號諸仙設讌不食問之云聞
本寺鐘聲方食少頃果聞鐘聲上遣兵衛取其鐘鐘飛西

崖今名墜鐘崖踰百歲髮尚黑不食百日而化

全福俗姓田祁縣人諸仙徒也從遊於汴徽宗賜號全福出
入乘虎神通殊夥齡百餘整衣化色如生

龍潭祖師嘗居石壁寺夜誦華嚴經有鳩鴿二鳥集左右聽
之一日二鳥墮地死雙生於縣北坡底村榮氏啼泣不止
師尋至語其父曰汝二兒許爲吾徒當令勿泣父諾卽以
手摩其頂曰我徒勿泣果止長從師四十年胥坐化稱鳩
鴿二祖

金

常天壽徐溝人方能言作詩云我有一卷經不用筆寫成展
開無一字晝夜放光明年甫四歲而逝

元

山西通志 卷一百五十九
印寶榆次人俗姓康師妙聰禪師戒行甚高後住持汾州法興院坐逝三日荼毘烈焰中有金光獲舍利數千粒眼舌胥備有人見寶於黃蘆嶺單騎西去云

大漢僧錄姓聶氏法名安身長九尺能誦咒驅邪通藏經中統三年召爲殿中將軍不拜命爲縣僧錄賜禪衣二卽號大衣禪師後圓寂有舍利紅光建塔於安定村寺禪衣遺貯龍山永寧寺庫

志保師字德全自號道真子出於祁邱程氏時盤山樓雲大師闡教燕都往事之輒領其緘要樓雲許爲他日道統所寄栖白霄都山疊石爲龕猛獸時弭服龕下元帥單公築元真觀以居之庚戌都道錄樊志應薦其名定宗賜金冠法衣升額爲大元真萬壽宮中統加號冲虛清淨至德真

人其嗇神葆真之蹟占卜推測之妙靈飛十二科品之秘心皆了然而不挂口至元庚辰春三月九日付囑弟子劉志訓翌日黎明湯沐易冠服枕肱而逝春秋七十有八王構爲之記

洪智號大愚元初延住太原奉聖寺梵行精深儒書外典靡不覽法嗣希深一間淺浩昌杲惠喜等歷十有一傳胥克守戒律而浩尤明楞嚴疏之

明

楊魔頭太谷人出家資福寺散髮蓬頭似風癩洪武時晉恭王數召見有事叩問輒先知一日侍奕忽假寐旣覺詰之應自平陽來看刈麥且得齋王哂曰何誕也卽出二麥穗四饅頭於袖中驗之平陽信然尋還晉陽莫知所終

山西通志 卷一百五十九
板特達西域僧洪武初從晉恭王之國居普光寺能驅雷雨
役鬼神勅封大國師圓寂獲舍利萬餘

昌海太原人俗姓許叅徹半藏禪師與洪蓮義金談道人稱
海金蓮三高士早禱輒應隱崛巒山刺血書五大部經百
十三卷校正華嚴合論五臺清涼傳本宗二百問胥楷書
永樂中詔選赴京纂修大藏經一日更衣趺坐逝年八十
有二

義金太原人俗姓張氏禮了空爲師洪武間遊金陵受戒復
歸行曹洞宗永樂壬辰詔赴京讐校內典并三藏法賜衲
衣禪褥著勝嚴集校正水陸儀文六卷

洪蓮太原人姓吳氏早喪父事母孝母歿投晉城西饒益寺
僧智巖出家戒行卓越詣天龍洞刺血書五大部經文永

樂中詔選註大明三藏法數校大藏經典旣成上進賜衣
設宴欲授以官懇辭還山

佛幻和尚住徐溝福興寺修寺缺材用衆方難之佛幻曰某
日某施主當至至期輒驗歸寂豫白於衆後十日披衣跏
坐逝 以上釋

平陽府

陶唐

藐姑射山神人莊子藐姑射之山有神人焉肌膚若冰雪綽
約如處子不殮五穀吸風飲露乘雲氣御飛龍而遊於四
海之外大浸稽天而不溺大旱金石流土焦而不熱堯往
見之窅然喪其天下

偃佺采藥父也好食松實形體生毛長數寸兩目更方能飛

山西通志 卷一百五十九
行逐走馬以松子遺堯堯不暇服也時人受服者胥至二三百歲焉

周

介子推姓王名光晉人隱而無名悅趙成子與遊旦有黃雀在門上晉公子重耳異之與出奔外勞苦不辭及還介山伯子常晨來呼推曰可去矣推辭母入山中從伯子常遊文公遣數千人以玉帛禮之不出後三十年見東海邊賣扇久之莫知所在

馬丹晉耿人文侯時爲大夫至獻公時爲幕府正獻公滅耿殺恭太子丹乃去至趙宣子時乘安車入晉都候諸大夫靈公欲仕之逼不以禮有迅風發屋丹入迴風中而去北方人尊祠之

漢

河上公結茆菴於河上賣藥因稱河上公文帝慕其人往見之忽駕茆菴騰空而去後隱入寶山中註老子道德經帝再求見遂以註授之今翼城縣東北二十里有河上村村有漢文帝廟

孫博河東人讀書善屬文晚學道能使草木皆爲火光照耀數十里行大水中身不沾濡人有疾指之言愈卽愈出入山間石壁如有穴者後入林慮山合神丹仙去

三國

焦先河東大陽人世莫知其所出相傳生於漢末及魏受禪嘗結草廬於河之湄獨止其中冬夏恒不着衣臥不設席又無草蓐以身親土其垢污皆如泥漆五形盡露不行人

山西通志 卷一百五十九
間後野火燒其廬先因露寢遭冬雪大至先祖臥不移人
以爲死就視如故度年可百餘歲梁州刺史耿黼以先爲
仙人云

北魏

王道翼東萊人少有絕俗之志隱韓信山四十餘年斷粟食
麥通達經章書符籙不交世務年六十餘顯祖聞而召爲
青州刺史遣使就山徵之翼乃赴都顯祖聽其仍守本操
令僧曹給衣食終其身

唐

韓仙君洪洞人龍朔元年在蜀村山中煉丹丹成化爲白鶴
飛去今村中有廟廟後丹竈遺址尚存

張氲一名蘊字藏真晉州人秀逸脩閑學道不娶嘗寓李嶠
家十餘年棲息洪崖古壇自號洪崖子天后及明皇朝屢
召不赴

張惠明趙城人結廬中條山遇混元子授以道術代宗詔入
便殿致醮有感封妙濟大師尋尸解於西岳

景成先生清奇早契道隱居姑射洞功成升翥遺蛻臥石上
至今如生歲季春望日士庶攀巖涉險拜謁者不翅數萬
人

後唐

洪崖子神山任張里人名居敬年四十辭家入山遇山神引
見景成子得姑射洞居焉能變化明宗召對稱旨賜爵不
受歸假葬衣冠脫然而去宋熙寧九年范諡撰碑記

宋

山西通志 卷一百五十九
張伯端天台人翼城紫陽宮其修鍊地也列仙傳云伯端少好學晚傳混元之道治平中隨陸龍圖寓桂陽宋熙寧二年遊蜀遇劉海蟾授以金液還丹訣乃改名用成字平叔號紫陽山人後轉徙秦隴久之訪扶風馬默處厚於河東乃以所著悟真篇授處厚曰平生所學盡在是矣願公流布此書當有因文而會意者元豐五年夏趺坐化年九十有九歲弟子得舍利千百大如芡實色紺碧識者曰此道書所謂舍利耀金資也後七年劉奉真遇紫陽於王屋山留詩一紙而去紫陽嘗謂已與黃勉中維陽于先生皆紫微星號九皇真人因誤校勘劫運之籍遂謫人間宋時紫微垣光耀可見者六星而已

甄棲真字道淵單州單父人博涉經傳工詩賦應進士舉不中遂讀道家書訪道於牢山華蓋先生久之出遊汴因入建隆觀爲道士以藥術濟人不取其報祥符中寓晉州晉人愛之以爲紫極宮主年七十有五遇許元陽曰汝風神秀異有如李筌雖老矣尚可仙也因授鍊形養元之訣棲真行之二三年漸反童顏攀高攝危輕若飛舉乾興元年秋謂其徒曰此歲之暮吾當逝矣卽宮西北隅自斃殯室室成不食一月十二月二日衣紙衣臥甄榻卒歲久形如生衆傳爲尸解棲真自號神光子與海蟾子以詩往還論養生秘術有還金篇兩卷

皇甫靖臨汾人母武氏夢神人授桃已而有娠長有方外志嘗往古耿有客竊物逃詣同州遇於途靖絕口不道前事嘗使汲水不辭客笑曰小子氣和可教也披戶而出久不

山西通志 卷一百五十九
還靖還視蓆下有黃金焉正酬所失後遊商山茅舍中坐
幅巾老人問疇日長安事靖再拜稽首留百日乃知爲郭
先生先生囑靖出欵書俾傳達乃孫長老劉真人郭師曹
先生也黎明靈化靖如囑詣江州訪孫長老適嵩山謁劉
真人示以神用又往廬山謁郭師赴都候曹先生還渡大
江仗劍禹步波濤頓息過鞏州河失故道沒民田數百頃
靖書符丙夜投之河詰旦河復舊流歸平陽霍邑令失官
庫金銀請於靖靖謂隸曰汝回已得真偷矣比至縣果獲
所失政和八年走三山寶籙壇前得三洞真篇暨法衣一
襲而歸數日逝詳毛安節傳

王道源太平賈岡人善易學南渡時避金兵隱於西山之麓
孝宗淳熙五年遇異人杖鑿而化後人名清廉洞旱禱多

應

寇嫗晉寧人見宋曾慥集仙傳

金

無名老人襄陵農家子姓陶母賈氏夢青衣童捧金盤獻菓
如瓜半紅半黃言上仙賜汝無名果因娠十三月而生性
沉靜嘗隨丹陽馬祖師過關馬曰此非干汝事汝自修行
去復乞化七年讀太上西升經豁然有省謂同行曰我今
還鄉去也前有韶州王氏請住菴我許往已而王氏果迎
至菴卽湯沐整衣逝年八十有六雅喜著詩皆言仙家事
郭元長趙城人生而聰慧七歲禮道士郭貞常爲師年十八
試居黃冠首禱雨獲應太和七年充提點太極宮授元靜
大師賜紫服圭璋自知終日壽七十有二里人立祠祀之

山西通志 卷一百五十九 三
煙霞真人汾西縣僧隱姑射園仙洞修鍊五十餘載癸丑端
午日忽辭衆曰吾當去矣言訖整衣坐化元大德間賜號
真人

秦彥容畧子爲黃冠師在平陽

元

姜善信趙城人禮蓮峰真人靳道元爲師隱居碧雲洞十年
塊坐一龕中統間世祖南伐駐師驛亭召善信問行師事
特陳仁義之舉後屢聘言事多中嘗過龍門修禹廟順帝
詔問禹所行之道引大禹謨以對又奏修堯廟年七十有
八終夜有青虹貫斗之祥追封靖應真人勅李槃撰道行
碑

按河津志云師修習龍門建禹廟平陽堯廟鼓堆孚聖

廟世祖召問賜號靜應真人命五弟子胥爲龍門建極
宮提點詳龍門御製碑記並不言順帝時事且善信年
止七十有八中統至順帝幾七十年疑至正時修廟者
係他人

酈希誠襄陵萬聖觀道士也生而骨古神異年十五入道初
金季道士劉德仁以苦節著五傳至希誠居燕天寶宮憲
宗名其教曰真大道授希誠大元真人領教事內出冠服
賜之仍給紫衣三十襲賜其從者至元五年世祖命其徒
孫德福統轄諸路真大道錫銅章二十年改賜銀印劉賡
撰碑記

張志清酈希誠三傳弟子也制行堅峻東海珠牢山舊多虎
志清往結茅菴居之虎皆避徙然頗爲人害志清曰吾奪

其所也遂去後居臨汾地大震城郭廬舍摧壓獨志清所
居裂爲二無少損焉乃徧巡木石間聽呻吟聲救活者甚
衆朝廷重其名給驛致之志清舍傳徒步至京貴人達官
來見率伏臥內不起道德摺紳先生則納屣杖屨不少倦
時人高其風圖畫相傳授演教大宗師凝神冲妙元應真
人
皮裘先生洪洞人修真玉峰山中冬夏服一裘雲遊金陵巨
室有太湖石令墜於井後歸玉峰淘井得前石病者拔裘
毛與之輒愈後不知所往
景素陽襄陵人師事梁古賓居阜山道院元季侍師不去兵
至將殺古賓素陽曰師老矣願以身代兵卽回刃砍之刃
忽折爲三兵皆羅拜而去

李大方汾西人父均業醫母管氏妊十二月而生長入道日
記千言詔賜號休元大師奉勅主醮百鶴來臨晉號通元
平陽早禱雨卽大澍復加號龍崗真人

明

崔真人名孟傳號朴菴襄陵北水關人冠野服雲遊授醫學
得壺公術萬曆時慈聖后疾篤應名醫詔自簾孔引線候
脉投劑立愈賜號真人後於武當羽化

尚青山霍州人居朝陽洞有脫形術常與平陽錢指揮共坐
任所索瞑目間輒袖中出之後解脫塑像於太清觀

任法素霍州人受業於尚青山解脫後人每於他所見之
王冲霍州人幼事黃老學能避穀遊汾結菴錠金原汲水以
資行人積金鑿井建閣崇禎丙戌遊武當福府廉知強司

其菴之錢穀一日集諸道流曰流寇將至請交所司時寇在河北衆莫之信三辭乃脫甫離菴寇猝至冲仍歸茶菴辛巳二月拜訣所知升榻端坐逝是日申刻有遇團柏澗者始知爲羽化云

國朝

成真智岳陽人幼爲道士年八十餘順治己亥春語其徒曰三月朔日吾當坐化命豫造龕具至期泥丸裂孔瞑目而逝以上仙

晉

曇恒法師河東人依遠公披剃年十二講說內外典籍無不通貫常有羣鹿馴遶坐隅後入廬山修淨業義熙十四年端坐合掌念佛而化春秋七十有一

隋

澄空開皇中年二十誓願於晉陽汾水西鑄鐵像高七十尺鳩集金炭周二十年乃辦選日寫像啟鑪無成稽首懺悔堅前約二十年復備啟鑪又無成澄空呼天求哀又二十一年復集遐邇衆登鑪巔百尺揚聲謂觀者曰吾少發誓願鑄寫大佛今年八十兩已不成此更違心則無身以終志矣吾今俟其啟鑪欲於金液舍命儻大像圓滿後五十年吾當爲建重閣萬衆號泣諫止澄空不聽俄而金液注射揮手謝衆投身如飛鳥而入及開鑪鐵像莊嚴端妙毫髮胥備開元初李暠充天平軍節度使出遊因仰大像歎曰如此好相而爲風日所侵惜哉施錢七萬緡周歲重閣成北都謂之平等閣計像成日至暠適五十年矣

唐

楊羅漢父任青州刺史母高好佛羅漢年十二至南嶽爲僧
越四載徹悟長安二年春司空山大虎十餘傷人盡降伏
之河東路巡撫使李景副使王永曙平陽太守錢光演同
遊玉兔觀遙見風穴山東白光貫霄命探之道遇樵叟陳
文樵子李八兒曰有一奇僧引十餘大虎頂放白光召文
等曰汝卽歸白李尚書王太傅錢太守說羅漢願見使還
報三人馳拜羅漢自述顛末復云聖道周圓歸真時至語
畢奄逝因改觀爲寺祀之後唐清泰乙未歲正月十八日
獵人郭遇郭欽王思蘊徐守元見玉兔入孔穴以鑿掘之
有菴門掩閉推視金身如生周顯德間學究王福新記
曇璫襄陵人姓王氏父成母皇甫氏無子禱於佛寺而生長

禮鳳翔妙覺禪師天寶元年至襄陵崇山二兔引徑入遂
於山巔起浮屠戒行精嚴龍神聽講早禱立應廣德二年
晉絳太守張光俊楊子宏表聞代宗賜寺額曰普救號慈
濟大師

智興趙城人修行終南山後棲中條山大通嶺聚徒說法聲
震長安睿宗三召不至乃截其舌以進命焚之化爲金舌
夜哦經如故賜號金舌和尚 一作開成間文宗三召不
至

金

法敷年十一從妙空大師十年盡師之道聽金剛經得元旨
嘗賜紫衣天會六年住平陽天寧萬壽寺演說金剛晚年
不出戶闕端坐而逝

元

弘辨大師姓郝氏翼城金山寺僧幼敏慧日記三千言講說法要人服其精詣翰林學士承旨趙孟頫撰書道行碑和楫曲沃人至元初住絳州寂照院戒律精嚴尤明陰陽術數學居嘗不出人或遇於里巷咸異之壽八十一終荼毘得舍利數百粒

雄辨大師洪洞人俗姓范名洪源至元間追報父母以掌為鑪燃香千炷并涸跣跡其上水溢成河後至正定臥化得舍利百十餘粒今實際寺有像詳見松菴老人石偈

明

定山和尚太平人俗姓彭名滿出家雲遊洪武十二年住蘆溝橋三昧火焚而化

圓鏡臨汾人嘗遊隰州妙樓山石室寺至北門瓦窰坂鑿洞構菴龕坐其中囑徒眾曰明日午時當歸次日沐浴焚香說偈而化

然燈和尚臨汾人名性平居五臺華嚴嶺獨坐誦經虎魅遁跡人甚奇之迎至堯王山中為建天光寺神宗召入內殿賜千佛珍珠紫衣賜號然燈主皇壇講經拜國師年餘辭歸河東延生菴以老焉

達連和尚趙城人正德間於霍山建瑠璃塔一座重修廣勝上下兩寺又建平陽府高河橋一座壽七十餘端坐逝人傳能前知云以上釋

潞安府

漢

王真上黨人年且百歲視之面有光澤似未五十者語人云
周流登五岳名山悉能行胎息胎食之方嗽舌下泉咽之
不絕房室 漢武內傳王真字叔經上黨人習閉氣而吞
之名曰胎息習嗽舌下泉而咽之名曰胎食真行之斷穀
二百餘日肉色光美力並數人抱朴子胎息者能不以鼻
口噓喻如在胎之中

郝孟節上黨人能含棗核不食可至五年十年又能結氣不
息身不動搖狀若死人可至百日半年亦有室家爲人質
謹不妄言似士君子曹操使領諸方士焉

趙瞿上黨人病癩垂死有以藥囊授之者服百日果愈後復
過視曰此松脂耳瞿鍊服不輟年七十見彩女長二寸遊
口鼻間一年女長如人在其側嘗聞琴瑟聲壽二百許顏

如童後入抱犢山不知所終

呂恭字文敬上黨人採藥太行山忽遇三人問恭曰採藥勤
苦好長生乎恭拜言志一人曰我姓呂字文起此姓孫字
文陽此姓王字文正皆太清仙人也子同我姓復同一文
字是有夙緣乃授以方藥遣還家已二百年矣五世孫習
亦慕仙隨恭入山俱莫知所之

晉

鮑靚字太元上黨人漢司徒宣之後仕爲南海太守性極清
慧學通經史人多從受業號曰儒林受陰君尸解法卒埋
石子岡有人發其棺見一大刀塚左右有人馬聲遂不敢
取葛洪曰此是劍解法

鮑姑靚女葛洪妻洪師事靚靚器重之因妻焉洪仙去姑尚

留南海後貞元中有崔煒者見一老嫗蹶破人酒甕被毆
煒憐之代償其值嫗不謝而去明日持艾來曰此越井岡
產也善灸贅後當遇美麗獲萬緡倏不見煒夜行失足墮
深穴中有白蛇光焰如電煒恐怖詣蛇叩禱見其唇吻有
疣請灸之應手而落蛇因吐徑寸珠煒不敢取乃引至別
洞見四麗人其一有疣曰知君有鮑姑艾請留少許以寶
珠酌之煒留艾攜珠以出遇胡商果以十萬緡易去及詢
鮑姑乃知爲太元女葛洪妻也

紫團真人隱居紫團山修真冲舉其遺詩曰閉定天厨只一
呼天罡不動運陰符流精鬱勃歸金鼎鍊出神丹滿玉壺
龍眉子引以爲金丹口訣

唐

樂氏二仙女屯留人其先世陵川商微子之後父山寶母楊
氏感仙光而娠誕有奇德繼母呂氏御二女甚酷單衣跣
足冬使採茹二女性至孝泣血浸土化爲苦苣其葉有赤
斑若血痕然得一筐以歸奉母母益怒移家於壺關紫團
山又令拾麥於外無所得畏母捶楚仰天號訴倏黃龍下
降少者先升須臾黃龍又降長亦升胥易金縷絳衣鳳冠
繡履仙樂響空天香馥路土人立廟祀之宋崇寧間顯靈
邊戍賜謚冲惠冲淑真人

焦道士襄垣人父爲吏有活人功道士生七歲不語一日忽
告其母曰明日師至果有道士來授以符籙修真龍洞山
年十三通天文地理象數之學能致風雨役鬼神後仙去
至今龍洞禱雨輒應

山西通志 卷一百五十九 五代

楊譚真黎城人清泰改元勅下諸州取黃冠精博者明年春譚真詣闕獻詩五篇賜紫綬歸山修鍊二十五年昭義節度使延至鎮祈禳有應一日夜息越明啟局視之不見裊褥惟遺珠千粒形似桐子色似金星瑩

金

張可用平順人隱於羊羔村崆峒山谷之石室十有餘載得服氣鍊神術虎豹屏跡盜賊不侵石坼泉溜清冷味甘多汲不竭少汲不溢病者飲之獲安鄉人後爲築觀大定三年賜額曰神祥

申仙自稱羊住潞城人幼聰慧從大禹山遇葛仙公授太陰鍊形術單衣跣足僵臥雪中鼾息雷鳴能預知水旱災祥

天壽病者乞藥隨坐中菓蔬與之卽愈年八十三卒殯百日時已冬夜半條聞霹靂聲詰旦視其塚有隙徑寸啟棺視之惟餘隻履單衾棕扇而已明昌五年延川秦知常撰記

元

神霄宮道人不知名元潞州守周幹臣宿觀中短檠膏盡道人爲三吹光彌盛達旦不滅又嘗與修撰傅岩輔飲出樽酒酌七十觥不竭及以水注之容不及半王嵩作酒聖燈神記今石刻存三忠祠壁間又明栗應麟李延馨延康幼同學觀中有道人至謂栗貴不勝壽二李壽不勝貴問姓名不答留題壁間曰鐵笛驚秋夜道人踪跡孤餐霞歸碧落跨鶴入元都海月丹陽路松風太乙鑪真同天地老若

山西通志 卷一百五十九 三
問姓名無後栗李胥如言疑卽元時道人云

李子榮長子人遍遊名山後歸結廬日不再食臥不貼席究方外之學焉

吳志堅隸籍長子年十七至燕薊間禮清虛大師杜志明爲師長春真人嘉其服勤不怠錫以今名後歸鄉井邑人信奉之至元間誠明張真人命爲道正建通元觀

明

鮑老年八十餘短髮不簪如雪嘉靖癸巳閉關五龍山三月而髮黑者半期年如漆潘府招之不來六月六日坐化

李僊姑長寧人能修鍊終老繡山之巔生於元至正二年成真於洪武八年賜號純淑真君

張甲元黎城人少卽好道爲人牧羊沁水以鞭畫地爲圈羊

不得軼言事胥驗 以上仙

北齊

曇榮保定張氏子通儒術年四十遊潞州居黎城能使猛獸馴狎不復驚人州人迎居法住寺年八十五入寂時稱伏

虎禪師

法聰南陽內史陸機之兄隱龍門山麓坐雪誦經弭虎害人呼神僧文宣帝召見與語甚悅勅建寺曰法華至宋太平興國賜額曰龍門今屬平順縣

北周

惠瑱上黨開元寺僧精嫻內典建德六年禁緇度瑱抱經像徙居岩谷盜謀劫之忽一丈夫乘馬自山巔下日夜有盜宜急避瑱知其爲神合掌拜曰釋教衰微仰祈庇覆否則

山西通志 卷一百五十九
守死而已更何所避夜大雪賊不得進及霽盜終不能犯
後莫知所終

芊上人修真寶岩寺端居石室猛虎自伏後坐化遺骨甚重
其徒建塔崇奉寺在太行山巔俗名金燈寺

唐

三目僧襄垣人俗姓王左肱有一目後啟左臂目述古疏一
編印造藏經二千餘卷貞觀中趺跏化

義福姓姜氏潞州銅鞮人爲神秀弟子初止藍田化感寺處
方丈二十餘年未嘗出後隸京城慈恩寺開元十一年從
駕往東都途經蒲號二州刺史暨士女皆齋花幡迎之二
十年示疾張均房瑄嚴挺之韋陟皆往承訣而張以服丹
不臨喪先避去乃謂房曰張有非常之咎名節皆虧若終

此法會可以免難惜其先去也公必爲中興名相遂卒賜
號大智禪師葬於伊闕之北中書侍郎嚴挺之爲製碑文
後張竟陷於賊嚴與房輔贊兩朝悉如其言

普滿大曆中澤潞僧也不拘僧相言事往往有驗建中初題
潞州佛舍曰此水連涇水雙珠血滿川青牛將赤虎還號
太平年人莫能知其解及賊泚稱兵方悟此水者泚字涇
水者自涇州兵亂也雙珠者泚與滔青牛者興元二年乙
丑歲乙未青丑牛也明年改元貞元歲在丙寅丙火赤寅
虎也至是賊已平故云

安公隱居壺關山中素爲土人頂禮及卒山出石棺土人收
葬之卽以安公名其山

五代

山西通志 卷一百五十九
周麻衣僧綿上人雲遊襄垣紫巖山洞建寶峰寺善相人窮
通壽天胥驗著相書金鎖賦銀匙歌行於世

宋

宋謙潞城人少穎悟遇異僧髡度天聖中坐化於楞嚴院
伏虎禪師棲黎城縣顯慶寺嵐山麓有雙虎爲患至卽馴伏
又嘗喝呼水飲水卽自地中湧出凡行石上至今有履杖
形石鐫遺像猶存

金

德崇禪師上黨潞人大定三年受具爲僧至方山謁才公大
士許以傳法指期而別又參宗鄭卞深徹淵源嘗遊熊耳
山吳谷卽太行古道也斷崖懸絕爲建橋梁見者稱神十
九年築室大通寺門徒數千俄方山老約書到呼徒取筆

書頌趺坐而化茶毗得舍利千粒建塔以藏校書郎雲騎
尉賜緋魚毛麾撰銘定遠大將軍開國伯完顏真立石刻
像

元

政忠屯留人俗姓周爲普明寺僧常入定澹旬不食頂上有
光壽百歲雲遊至輝縣而化得舍利數枚五色圓瑩建浮
圖夜常有光

淨公和尚俗姓李潞州人昭覺寺僧幼穎悟父授孝經至曾
子避席卽整衿起父問之對曰聞師命尚如此况父命耶
後應召作資戒大會賜紫衣遣還

道榮紫團僧了悟能振宗風

正宗興教禪師潞州人幼名張德十二歲禮紫團僧道榮爲

山西通志 卷一百五十九
師精內典座下聽講者雲集晚悟禪理同大力士渡海莫
知所終

慧冲有道行延祐四年居平順清涼寺

子晏壺關人關天慶之子幼師慧冲精禪理後於鳳凰山建
道場寺無水嘿祝巽巖甘泉隨湧入定出神同日遍赴諸
會所衣履不殊詔賜袈裟紫絛玉環

明

癩僧弘治初知州馬毀淫祠郡北關有古刹緇流圖去僧笑
曰勿去此榮靖家佛堂與國同休旣而沁源王奏留勅名
普惠及王薨謚榮靖至闖將劉芳亮拆四關寺亦毀言悉
驗

寂慧清涼寺僧不出戶二十年言休咎奇中先期示寂

明周號懶雲潞安人住持法住寺除夕詩爲謝茂秦所稱有
集行世

了白禪師又字石相黎城人萬曆間居大通寺通儒書善解
紫陽註疏以上釋

汾州府

周

尹澄字初默安王時人嘗燃燈無焰自然有神光空映入山
遇雨食盡有羣鹿掩至饑則吮其乳倦則臥其懷又登山
火發羣猿連臂而下攜以直上乃免秦始皇漢竇太后皆
敬事之後改名林赴太乙山遇石芝發光採服之日行六
七百里度世三百四十餘年昭帝時仙去

漢

山西通志 卷一百五十九
長命女武帝時西河人以仙去宋開寶四年有掘地城東者
得石碑鑿仙降二字衆禱請復懸筆書仙降二字深貫石
中因建聖仙廟豎碑於廟將兩碑必先潤邑傳兩蹟仙碑
仙童武帝嘗於孝義縣西王才里見一童子年可八九歲曰
吾居丹洞使往璠田聞西河有長命聖女因假而來言訖
上升

西河少女神仙伯山甫甥漢遣使者經西河城東見少女笞
老翁翁跪而受杖使者怪問答曰此妾兒也昔妾已老舅
氏得仙術隱華山憫妾多病授以神藥漸復少容今兒不
肯服藥致此衰老故與杖耳使者問其年曰一百一十歲
兒才七十耳尋入華山

唐

薛守元住平遙太平觀締造爲一方勝

宋

薩守貞汾陽人少有濟人利物志嘗學醫誤用藥傷人遂棄
醫學道遇三十代天師虛靜先生及林王二侍宸各授以
法由是道法大顯自稱汾陽薩客

郭竹師汾州人見宋曾慥集仙傳

元

于道淵授通元微妙靜照大師冀寧路平遙縣太平崇聖宮
住持本宗提點高道陟通義中和大師本宮提點趙道恒
棲遠常妙大師提舉見元蒙古碑

郝志松字善甫居太平興國觀元制贈能仁普濟冲虛真人
有碑姚學士樞撰文

張真一號丹華子元初修鍊汾陽西巖古洞後叅邱祖錫號歸建西巖菴丁亥五月有白鶴來止巖際久乃飛去後是日至者復再真一羽化而洞有遺音因號鳴鶴古洞清和真人邱長春弟子也居興國觀元掌教大宗師賜號清和真人亦自號清和子

梁誌通介休人號達眩子元丙子間慕道西遊終秦之玉泉觀或遇於長安灞橋與使客傳鑰封煙霞無爲真人

明

范榮字子蘭介休人永樂甲午舉人任江西興國令相傳曾遇仙人張三丰遺詩曰鐵笛風吹破曉煙相逢又在十年前曾將物外無爲事訴與毫端不盡傳白髮垂纓君已老青雲得路我爲先世間舊景只如此何不同歸一洞天

祖朝邑人忽遇榮於京師榮約終日飲邑人笑而去後成祖物色三丰不得徵知與子蘭友因遣使至介休訪之邑人云見子蘭於京邸遂與偕往榮曰吾固知君之必復也相與傾倒頃之竟不知子蘭所往

麻衣仙姑汾陽任氏女永樂初披麻衣隱石室山中家人求之弗得後有見者遂逃入石洞聲隱隱如雷壁遂合手跡尚存

王元寧鄉人少貧負薪同樵者歌詠胥叶仙什娶妻未婚薄遊燕習吐納術旣卒太監梁訪將殯之啟棺無迹人復見於關西連雲棧中

韓教遠修真寧鄉沒狐觀嘗養鹿名仙童後與徒胥斃於盜鹿觸石亦斃數日人自平陽來者云見沒狐二道士引鹿

山西通志
卷一百五十九
南去

王綱居孝義北姚村之古廟終年不舉火嘗約人遊五臺其人不告而去至山下道人笑迎之已先至矣又送下山囑曰我所居屋勿爲風雨毀壞及其人歸道人乃立化古廟中計卽山下笑迎日也因立碑以誌異云

高神仙臨縣人少遇異人授木尺病者擊尺輒愈冬時浴湫河水立解

孫浩遠字雲際自號樂陽子永寧州人得五雷天心正法禱雨立應以符藥濟人疫癘多解後羽化

國朝

賀登科石樓人髻齡結廬飛龍山建元天宮三座造銅殿一座銅牌坊一楹在山六十年壽七十有八康熙癸未夏兀

坐而化邑人塑像以祀焉

以上仙

北齊

淨愍禪師住汾州百福寺

唐

無名祖師自西極來居麓臺山四十年肅宗召至京叩無名之旨答曰大方造物總持萬變走爲日月駕爲雲雷四時行百物生收功於無形者天地之心也大人御世不煩而治鼓之爲太和不識不知而天下歸心焉者至人之妙也是故上聖得之而無爲彼蒼燾之而奚言抑何絜絜於細名哉上善其言待若惇友上元初化詔回故山宋慶曆間砌塔藏之高三百尺又名麓鏡臺

無業禪師俗姓杜商州上洛人傳洪州心印後止西河衆香

佛刹州牧董叔經延住開元精舍謂弟子曰吾緣在此學者致問多答曰莫妄想憲宗召以疾辭穆宗遣僧錄靈準賚勅迎遂示寂長慶三年十一月葬練若之庭琢石爲塔號澄源謚大達國師

尚顏字茂聖俗姓薛尚書能宗人出家荆門工五言詩集五卷今存詩三十四首

臥如居法燈寺洞達科條無病而寂後多顯跡宋元時寺燼像如故因號爲臥如菩薩

宋

善昭禪師住太子院卽今天寧寺并汾苦寒偶罷夜叅有異比丘振錫而至謂會中有大士六人奈何不爲說法言訖而去師記以偈曰高僧金像光爲法到汾陽六人成大器

勸請早敷揚

白衣菩薩孝義令狐村人道成至南澗石上欲示寂適牧豎擾之俯地泣淚滴成窪坐跡深幾寸許乃往靈石高山巖下坐化後立祠

金

益和尚法名志益初剃度於栢山後得法蒙山雲和尚叅頌曰跛躄痿羸鈍復痴口如鼻孔眼如眉自從一吸西江盡天上人間更不疑學士王庭筠子端閒居與雲和尚友因見益公益公歸晉過庭筠庭筠贈以詩承安元年居超山年七十有五貞祐二年坐化

元

圓光禪師號勝默子永寧州南山寺僧戒行卓越名震京都

明

了覺俗姓張詣崑山從慧澄大師落髮徧遊名席探得元樞
後住汾天寧寺十有七年壽八十一枕股而寂

國朝

際得字松野往平遙超山善詩多佳句工行楷時推重之
蘭如汾州人明季行脚淮揚頂宣缸募米誓齋十萬八千僧
後住善慶菴十方院順治時示寂入缸三年啟視如生僧
衆建堅固院以供焉

德楷號栢山嗣洞宗三十一世康熙初愛龍山林壑幽勝遂
卓錫焉建華嚴禪院

德睿號雪岸楚人德楷法弟著龍山志并詩文行世

清源俗姓宋代州人年六十至平遙睡佛寺年百有五歲寂

性善字純天俗姓李隰州人出家安國寺博覽五經性理諸
書工於詩文于清端成龍讀書寺中夢餐鉢羅花性善檢
藏曰此優曇花也成龍作詩記之以上釋

大同府

漢

昌容常山道士自稱殷王子食蓬藁根往來山下見者三百
餘年顏色如二十許人見漢劉向列仙傳

茅盈字叔申生於漢景帝中元五年年十八棄家入恒山修
道餌朮後師王君因西至龜山歸入恒山北谷時年四十
九至宣帝初元四年上昇弟固衷亦成仙稱三茅真君
黃安代郡人貌常若童子服硃砂舉體皆赤冬不裘坐三尺
神龜時人問坐此幾年矣曰昔伏羲始造網罟獲此龜以

山西通志 卷一百五十一
授吾吾坐龜背已平矣此蟲畏日月之光三千歲乃一出頭我得龜以來已五出頭矣行則負龜而趨武帝聞其異每屈禮焉及封泰山詔董謁李充孟岐郭瓊黃安五人同輦謂之五仙臣後不知所之

北魏

道士寇謙之字輔早好仙道服食藥餌有仙人成公興傭賃謙之家謙之算七曜不了興曰試隨興語布之俄然便決謙之歎服請師事之興固辭不肯但求爲謙之弟子共入華山令居一石室自出採藥還與謙之食不復饑繼入嵩山有三重石室令住第二重興曰興出有人將藥來但食之尋有人將藥至皆毒蟲臭惡之物謙之疑怪出走興還問狀謙之具對興歎息曰先生未便得仙政可爲帝王師

耳興事謙之七年入第三重石室而卒尋復著衣持鉢執杖而去謙之守志嵩岳精專不懈神瑞二年十月乙卯忽遇天神乘雲駕龍集止山頂稱太上老君授謙之天師位賜雲中音誦新科之誡二十卷號曰並進言吾此經誡今運數應出汝宣吾新科清整道教并授服氣導引口訣之法泰常八年十月戊戌有李普文來臨嵩岳云老君之元孫昔居代郡桑乾以漢武之世得道爲牧土宮主遺授謙之錄圖真經令佐北方太平真君出天宮靜輪之法能興造克就則起真仙矣始光初謙之奉書獻之世祖令止於張曜之所供其食物時朝野聞之若存若亡未全信也崔浩獨異其言師事之受其法術於是上疏讚明其事世祖乃使謁者奉玉帛牲牢祭嵩岳迎致其餘弟子在山中者

山西通志 卷一百五十九
於是崇奉天師顯揚新法宣布天下道業大行及嵩高道士四十餘人至遂起天師道場於京城之東南重壇五層遵其新經之制給道士百二十人衣食齋肅祈請六時禮拜設厨會數千人世祖將討赫連昌問幽徵於謙之對曰必克果定夏國真君三年謙之奏造靜輪宮必令其高不聞雞鳴狗吠聲欲上與天神交接功未成九年復遇設會日謙之令更布二席於上師坐前弟子問其故謙之曰仙官來是夜卒須臾口中氣狀若煙雲上出窗中至天半乃消諸弟子以爲尸解云

李皎中山盧奴人壽春侯先子爲寇謙之弟子服氣絕粒數十年隱於恒山年九十餘顏如少童一旦沐浴冠帶俄坐卒

韋文秀京兆人隱於嵩高徵詣京師世祖曾問方士金丹事多曰可成文秀對曰神道幽昧變化難測可以閻遇難以豫期臣昔受教於先師曾聞其事未之爲也世祖遣至王屋山合丹焉

唐

管革趙人少好道不事耕鑿多遊趙魏間性不好謙恭而復辨慧遇張果先生先生招之曰來管革革曰爾誰耶曰我張果先生也革乃曰張果何呼我也果曰人間帝王且我敬爾豈不我敬也革曰我非帝王又焉能敬爾也果因命之同遊恒山革從之果擲所策杖變一青牛令革乘之入恒山登絕頂坐而問之曰人間之囂雜塵中之苦惱春秋之榮謝老少之逼促爾盡察之也何久遊趙魏不遠遊四

山西通志 卷一百五十九
極趙魏戎馬之郊也非道人所宜遊革對曰爾何爲出於
趙魏之間也唯道人不隨土地而化我遊趙魏之間與遊
玉清蓬瀛等若以彼帝王爲尊以我匹夫爲賤呼我之姓
名談帝王之敬待猶俗情也我無俗情又奚以遠遊爲果
笑而不應革遽起不辭而下因結草於山中居之後不知
所終人或見之於稽山

負局先生語似燕代間人常負磨鏡局徇吳市中街磨鏡一
錢因磨之輒問主人得無有疾苦者出紫丸藥與之得者
莫不愈如此數十年後大疫活者萬計不取一錢吳人乃
知其真人也後至吳山絕崖頭有求藥者懸而與之將去
語人曰吾還蓬萊山當爲汝曹下神水崖頭一旦有水白
色流從石間來服之多愈疾立祠十餘處

明

任榮大同縣人世業醫至榮益精尤好神仙術弘治元年年
六十無疾卒踰年鄉人陳守過陳州見榮施藥市口大驚
曰公無恙耶榮笑曰然固未死也嘉靖壬辰大同黃令妻
父張遇道人於伏牛山曰我大同任榮也公去某日當與
小孫會幸傳道之異日張果晤其孫言盡符萬曆二年大
同張省祭抵湖廣艾御史所艾家人經武當山見草菴中
道士兀坐謂之曰爲我告張省祭歸語任榮子孫榮俟宮
殿畢或當歸也言畢忽不見凡三露踪跡云

連步雲陽和人工也異人受符咒禱雨立應耳着銅環袖
胡桃搖動應聲起霹靂沾足乃止隆慶末大滂雲令家設
鍋蓋於門蒙以白紙上書青天白日不三日遂晴病者乞

符多愈萬曆時老人胥能言之 以上仙

北魏

法果趙郡人誠行精至開演法籍太祖聞其名詔以禮徵赴京師後以爲道人統縮攝僧徒每與帝言多所愜允供施甚厚至太宗彌加崇敬永興中前後授以輔國宜城子忠信侯安成公之號皆固辭帝嘗親幸其居以門小狹不容輿輦更廣大之年八十餘泰常中卒未殯三臨其喪追贈老壽將軍趙胡靈公初法果每言太祖明獻好道卽是當今如來沙門宜應盡禮遂常致拜謂人曰能鴻道者人主也我非拜天子乃是禮佛耳法果四十始爲沙門有子曰猛詔令襲果爵

惠始姓張家本清河聞羅什出新經遂詣長安見之觀習經

典坐禪於白渠北晝則入城聽講夕則還處靜坐三輔有識多宗之劉裕子義真鎮長安及寮佐皆重敬焉赫連屈丐追敗義真惠始身被白刃而體不傷衆大恠異言於屈丐屈丐大怒召惠始於前以所持寶劍擊之又不能害乃懼而謝罪統萬平惠始到平城世祖甚重之每加禮敬惠始五十餘年未嘗臥或時跣行雖履泥塵初不汚足色愈鮮白世號白脚師太延中臨終於八角寺齊潔端坐僧徒滿側凝泊而絕停屍十餘日容色不改舉世神異之遂瘞寺內至真君六年制城內不得留瘞乃葬於南郊之外死十年矣開殯儼然送葬者六千餘人中書監高允爲傳頌其德

曇曜有操尚爲恭宗所禮先是太武滅佛法曜誓欲守死恭

宗親加勸諭至於再三不得已乃止密持法服器物不離
身高宗踐極詔復佛法曇曜自中山被命赴京值帝出見
於路御馬前銜曜衣時以為馬識善人帝後奉以師禮初
平初代師賢為沙門統

師賢本屬賔國王種人少入道東遊涼城涼平赴京罷佛法
時師賢假醫術還俗守道不改修復日即返沙門其同輩
五人上親為下髮師賢仍為道人統

師子國沙門邪奢遺多浮陀難提等五人太安初奉佛像三
到代都皆云備歷西域諸國見佛影迹肉髻外國諸王咸
遣工匠摹寫其容莫及難提所造者去十餘步視之炳然
轉近轉微

沙勒太安間赴京師致佛鉢并畫像迹

常那邪舍天竺沙門也曇曜嘗與譯出新經十四部

沙門道進僧超法存等並有名於時演唱諸異顯祖即位敦
信尤深覽諸經論好老莊每引諸沙門及能談元之士語
諸理要

道登雅有義業為高祖眷賞恒侍講論二十年卒詔施帛一
千疋又設一切僧齋命代城七日行道并詔準師義哭諸
門外

跋陀西域沙門也有道業至代都深為高祖所敬信詔於少
室山陰立少林寺居之給衣供

唐

誠慧靈邱李氏子其親禱於臺山而娠長不願娶從五臺真
容院法順和尚披剃東臺東有毒龍池龍常害物誠慧攜

淨瓶錫杖廬其側呪之龍卽入瓶風雷皆寢居七日龍革
毒心白光洞室乃釋之乘風雲而去嘗誦華嚴於李牛谷
有五六儒服者來坐聽或持異花鮮果而獻怪問之答曰
某山神也願充執侍誠慧捨而他適同光元年莊宗製書
并紫衣賜之書云師鷲嶺名流雞園上哲精持護鵝之戒
弘宣住雁之談潛括三乘深明四諦忍草常新於性苑覺
花不染於情塵高蹈雲峯棲心聖境汎慈舟而濟溺持慧
炬以照迷五百龍王皆皈懿德十千聖衆盡繼高蹤爲萬
姓之甘霖作空門之標格朕方興景運大闡宗風宜旌精
行之名以奉無爲之教崇號廣法大師兼賜紫衣固辭不
受復降勅諭畧云再遣內臣遠頒成命師號旣旌於道行
紫衣無爽於受持久屬當仁匪宜多讓誠慧聞命卽囑累

門人吉祥而逝壽八十謚曰法雨大師塔號慈雲

金

圓滿西京大普恩寺僧天會中修建寺宇功行精勤江東朱
弁爲之記

元

劉秉忠瑞州人祝髮寓雲中南堂寺世祖在潛邸海雲禪師
被召過雲中邀之同行入見大喜後爲佐命元臣封國師
太保

李溥光大同人幼出家爲僧號雪菴和尚喜讀書經傳子史
無所不窺善詩工書法遒勁有致一時宮殿扁額皆出其
手至元間詔蓄髮授昭文館大學士有雪菴集帖傳世
印簡俗姓宋世業儒年十一祝髮佛書無所不通及王公問

山西通志 卷一百五十九
治民道必以儒術爲先後遊雲中住華嚴寺年五十六示
寂茶毘日煙焰所至皆成舍利

明

覺同大同人姓康幼慧讀書過目不忘能文辭尤工臨池書
善化寺讚數千言咸珍爲名翰時人讚曰續佛慧命湛然
清淨遐邇聞聲詩禪草聖

一齋大同地藏菴僧持戒律終日一室外別無所有施金帛
多不受受亦隨施貧者不留其餘或雨雪則累日不舉火
苦行三十年一日沐浴趺坐化

國朝

常修號潤普大同人本姓楊棄家雲遊山水後卓錫於都門
之愍忠寺苦持戒行日誦法華經一部歷四十餘年衆請

爲大和尚歲傳戒三壇弟子數千人年七十五端坐說偈
而逝 以上釋

朔平府

元

張可曇雲中人生於世祖初幼好道棄家業雲遊山水間年
幾百歲童顏不衰過交城止棲霞觀人呼爲石頭道人時
值重陽語衆人曰明年此日我乃與汝等別矣至期果尸
解時至正元年九月九日也

柳道士不知何許人相傳法甚高右玉城北三里許有真武
廟廟前有泉嘗出怪物傷人道士命童弟子捧劍泉側囑
曰吾下捉怪伸手取劍爾當與之遂入須臾見手出大如
輪色如靛童失聲棄劍而走道士竟不出怪亦隨滅今其

山西通志
卷之五十九
泉爲草灘

以上仙

寧武府

元

薛道紀樓煩人居沁源太清觀驅孽龍息水患遠近禱者無
虛日壽百歲一日宴坐見松枝上山猿來謁謂弟子曰此
木客報我歸期也端坐而化

以上仙

晉

慧遠姓賈氏雁門樓煩人蓮社十八高賢傳曰年十三依舅
令狐通六經尤善莊老二十一聞沙門道安講般若經豁
然開悟遂與弟慧持投簪受業沙門曇翼每給燈燭之費
太元六年立精舍於廬山以去水猶遠舉杖插地泉湧時
亢旱於池側誦海龍王經有神蛇浮水俄大雨因名龍泉

精舍慧永師謂刺史桓伊曰遠公方當弘道而貧道所居
隘不可處其夕大雨雷震詰旦林麓廣闢素沙布地榎楠
文梓充布上下不知所自至伊乃爲建刹名其殿曰神運
以在永師舍東號東林複製五銘刻於石先是陶侃刺廣
州時漁人於海中得金像文殊及移督江州迎像還潯陽
舟近而溺師禱之忽浮出迎至神運殿造重閣以奉之製
讚曰諸教三昧其名甚衆功高易進念佛爲先旣而不期
而至者道生等十八人結社念佛復率衆百二十三人同
修淨土業造西方三聖像建齋立誓令劉遺民著發願文
王喬之等爲念佛三昧詩以見志居山三十年跡不入俗
義熙十二年七月晦夕方從定起見阿彌陀佛告曰汝七
日後當生我國卽寢疾製遺誠令露骸松林之下卽嶺爲

墳八月六日順寂弟子不忍露屍與太守陶稱奉全體葬於西嶺素石爲塔靈運作碑以銘遺德張野作序自稱門人宗炳復立碑於寺門以表德業所著有法性論十四篇論五篇經論諸序銘詩記凡十卷號廬山集唐大中二年追謚辨覺大師南唐昇元三年追謚正覺宋太平興國追謚圓悟大師凝寂之塔 張野遠法師銘師誦鑿淹遠高悟冥蹟道安常歎曰道流東國其在遠乎襄陽旣沒振錫南遊結宇靈嶽自年六十不復出山名被流沙彼國僧衆皆稱漢地有大乘沙門每至然香禮拜輒東向致敬年八十三而終 僧傳北遠法師作涅槃經疏畢擲札於庭柳枝生焉皎然詩擲札成柳枝 遠公刻蓮花漏 齊已寄貫微詩注匡山遠大師嘗與諸賢遊石門洞玩錦繡谷貫

休東林寺傳記詩注盡云 安遠持柴三車盡生堯率天人間四十年彼天一晝夜亦三十日爲一月十二月爲一年壽四千歲 蘇潛甫西遊日記閩大叅爲言遠公者代州人也公生時其家有井產金靈芝水忽甘美異常諸病者飲之輒愈公去廬山而井如故味不能甘而疾不能治矣士人思之而新之剝曰聖井院日久忘其本實改爲樓煩寺郡邑乘皆不載今爲置一主其中云唐人有詩曰空悲廬阜月不見雁門僧其証也 曇詵遠公弟子常在左右 匡山神爲遠公侍者 遠公謂劉處士云世間惟是想耳苟放有世之見心卽道豈有世外物來羈爾耶 遠公高節食後不飲蜜水而將詩博綠醕與陶潛別人不得又送客不過虎溪而送陸靜修道士過虎溪數百步今寺

門前有道士岡送道士至此止也 盧阜雜記遠法師結
 白蓮社以書招淵明日弟子性嗜酒法師許飲即往矣遠
 許之遂造焉因勉以入社淵明攢眉而去 三藏記謝靈
 運恃才傲物見遠公肅然心服 高仲靈鈔書記靈運欲
 入社遠拒之曰子髮鬢而鬚美面與身戾非令終之相請
 多行陰德戒飭三年而後可靈運怒曰學道在心安以貌
 邪遠笑而不答 昔桓元入山禮遠公遂捨輦至今在遠
 公堂下貫休詩桓元舊輦殘雲濕聊舍孤墳落照邊
 慧持遠公同母弟也蓮社高賢傳幼讀書一日所紀常敵十
 日年十八與兄同事道安止廬山師身長八尺衲衣垂膝
 徒屬三百師為上首瑯琊王珣以書問寧遠持二公孰愈
 寧曰誠為賢兄賢弟珣復書曰但令如弟仍未之有况復

賢耶隆安三年辭兄入蜀遠曰人生愛聚汝獨樂離師曰
 滯情愛聚者本不應出家今既割欲求道正以西方為期
 耳至成都郫縣龍淵寺大弘佛法升其堂者號登龍門義
 熙八年順寂春秋七十六臨終以東間經籍付道弘西間
 法典付曇蘭 稽古錄義熙壬子垂戒門徒遂入定於龍
 淵龕樹至政和三年風折其樹持乃出定徽宗有像贊三
 首 以上釋

澤州府

漢

費長房修真高平縣之南山有提壺賣藥翁日行市中入壺
 以憇長房見而異之禮為師翁曰孺子可教並引壺中絕
 非人境遂予竹杖及縮地法數千里頃刻可至後不知所

終

魏

郝儉陽城人能行導引號三百歲武帝召問修鍊法太子暨陳思王輩咸調笑不之信因令辟穀百日而作止自如帝遂重之命爲方士領袖

晉

王烈澤州人入太行聞雷聲山石破裂數百丈中一孔有青泥流出烈取食之後仙去其仙經所謂石髓者耶

唐

李通敏高平人晏六世祖棄科舉學辟穀去妻子隱於西山不入城市年逾百歲無疾終後有遇於王屋者儀貌如生因名山暨井爲遊仙

宋

二張仙公一名崇真澤州人一名道溫京兆人同居州西上町社修真觀尋偕遊海島遇劉長生得其術復歸結茆於此相繼坐蛻瘞同穴後數十年人猶有見者

金

姬志真高平人號洞明子皇統中遊五岳歸語所親曰人生一夢耳捨宅作觀名清夢服紫衣爲道士見觀碑

通真子姓秦名志陵川人棄應舉學道隱王屋少室間後遇披雲老人於上黨授道籙遂立局平陽元都觀校補三洞書訖倏風雷大作遂立化著林泉集二十卷

元

鄭堃嚴沁水人通天文曆數地理學隱歷山遇異人授左慈

山西通志 卷一百五十九
術臥冰雪不僵縣令遣召之強試其術乃索一瓶側身入擊碎之則了無所見已遁矣明洪武初識者遇於襄鄧山中疾行如飛云

馬仙姑永平人幼慕棲真結屋高平縣西通義村日以鍊形爲事旁產香草飛鳥不期而集一日正襟逝邑立祠祀焉今董峰菴有石柳卽委蛻處以上仙

北周

慧遠澤州人甫六歲投曇始禪師得度武帝召對契合授法座尋退隱藏陰寺注涅槃經成擲筆云若疏合禪理筆當駐空已而果然其疏遂行入隋爲掌教釋經法師

後唐

大愚爲僧五音洞調演聲律能達旨要年九十餘一日別其

徒曰吾將歸矣端坐而逝洞中嘗聞五音聲後人因以爲名嘗作上心王狀奏六賊表蓋教乘喻言也錄進昭宗并韻母三十字詔賜田百頃祠部牒三十八道紫衣十道有愚公塔心王表碑在金峯

洪密陽城千峯寺僧俗姓劉早皈石霜契宗旨明宗爲太尉密預識之登極後命建禪院賜衣鉢蠲田租以勅書慰問詳司空圖記

明

法亮姓崔氏澤州人出家靈巖寺刻修戒行嘗行脚至鍾山造藏經歸禁足三年晝夜檢誦不輟作石塔藏之

祖湯陽城龍巖寺僧日誦經巖東小石龕辛亥六月六日方誦法華忽一兔徐入龕內蹲經案前誦已三揮不去自己

山西通志 卷一百五十九
至申湯曰吾送汝歸路兔從出門踴躍而去白所知爲作
銘識之 以上釋

山西通志卷第一百五十九

山西通志卷第一百六十

山西巡撫都察院右副都御史 臣覺羅石麟奉

旨修輯

仙釋 二

蒲州府

上古

紫府先生抱樸子真源黃帝以地皇九年正月上寅詣首陽
山宰牧從焉次駕東行詣青邱紫府先生授三皇籙及天
文大字次西入崆峒禮廣成子回駕王屋啟石函發玉笈
得九鼎飛靈神丹訣路史云陟王屋而受丹經

周

韓君丈人名終又名衆善幻養不服食年百歲其行如飛匿

山西通志 卷一百六十一
迹五老山阿不知所終

按王子年拾遺記閻河之北有紫桂成林其實如棗羣仙餌焉故韓終采藥詩云閻河之北實大如棗得而食之後天而老又抱朴子云韓終服菖蒲十三年詩載古逸當是周秦時人

漢

趙昉臨晉人張道陵弟子有仙術後飛昇今永泉里趙昉村其遺名也旁有昇仙洞存焉

北魏

羅崇之河東人受道於中條山世祖令崇立壇祈請崇云條山有穴與崑崙蓬萊相屬詔令河東郡給所須崇入穴行百餘步遂窮後召至有司以崇誣罔不道奏治之世祖曰

崇修道之人豈至欺妄以詐於世或傳聞不審而至於此古之君子進人以禮退人以禮今治之是傷朕待賢之意遂赦之

唐

閻家貞觀十四年爲河東太守後隱中條山羅通微事之十九年拜吉州刺史後表請入道賜名遺榮隸桃源觀朝端盛賦詩以贈之今王官谷上方有閻使君宅

羅通微臨晉人貞觀時母趙氏妊通微有雙鶴翼行旣生骨相巉崩稍長入山樵薪遇閻使君家授以幻養之術遂冠褐於五老峰之遊仙觀學步虛絕粒今太乙峰南步虛坪其地也後使君出牧吉州召通微及境有雙鶴樂聲自玉笥山來迎旣就館一夕月色皎然忽騰空吟嘯而去使君

表其事詔吉州立真人堂尋改降生之羅村為蓮臺村
張果不知何許人則天時隱於中條山往來汾晉間時人傳
其有長年秘術自云年數百歲矣嘗著陰符經元解盡其
元理則天遣使召之果佯死不赴後人復見之恒州山中
開元二十一年元宗令通事舍人裴晤往迎之果對使氣
絕良久乃蘇晤不敢逼馳還奏狀又遣中書舍人徐嶠齋
璽書以邀迎之乃至東都肩輿入宮元宗親訪理道并神
仙方藥之事及聞變化不測而疑之有邢和璞者善算人
知天壽善惡元宗令算果則懵然莫知其甲子又有師夜
光者善視鬼元宗召果密坐使夜光視之不見果所在帝
謂高力士曰吾聞飲董無苦者奇士也時天寒因取以飲
果果三進頽然曰非佳酒也乃寢頃視齒焦縮顧左右取

鐵如意擊墮之藏帶中更出藥傅其斷良久齒已生粲然
駢絜帝益神之欲以玉真公主降果未言也果忽謂秘書
少監王迥質太常少卿蕭華曰諺謂娶婦得公主平地升
公府可畏也二人怪語不倫俄有使至詔曰玉真公主欲
降先生果笑固不奉詔有詔圖形集賢院懇辭還山詔可
擢銀青光祿大夫號通元先生賜帛三百疋給扶持二人
至恒山蒲吾縣未幾卒或言尸解為立棲霞觀

薛季昌河東人遇司馬承徵於南嶽授以玉洞經籙高真屢
降其室元宗召入禁掖延問道德乃談及精微上喜恩寵
優異尋還山上贈以詩曰洞房修真客條陽念舊居將成
金闕要願奉玉清書雲路三天近松墟萬籟虛猶宜傳秘
訣來往候仙輿翌日丹成曰祝融峰今夕有天真會予被

山西通志 卷一百六十一
三

常醜女蒲州常志女貌陋有瘡疥屢藥勿瘳及笄無聘問者
一日出外以裳蒙首居人畏其裸而避之浴於池出則體
貌如玉身不着地騰空而去

呂巖字洞賓

一名巖客

禮部侍郎渭之孫河中府永樂縣人

蒲坂一云

人天寶十四載四月十四日巳時生成通中舉進士不第
遊長安酒肆遇鍾離權得道不知所往

有詩集四卷

宋史陳搏

傳關西逸人呂洞賓有劍術百餘歲而童顏步履輕疾頃
刻數百里世以爲神仙數來搏齋中人咸異之 宋曾慥

集仙傳呂洞賓又字希聖九江人曾授真筌於正陽子

按別

錄洞賓江州德化令棄官九江人非是

耿定向權子在昔呂純陽受學於雲

房鍾子鍾子故爲諸幻景歷試之猶未卽授一日涕泣請

鍾子曰子功行未累也呂曰何修而功行乃累鍾子曰須

金百萬博濟於世始得呂曰弟子窶人何從辦此鍾子曰

余有丹藥可化銅鐵爲金子第懷此博施慎勿泄也呂子

請曰是金卒當變否鍾子曰須三千歲後還本質呂子愀

然跪曰如此則悞三千歲後人矣功行之謂何鍾子悅曰

善哉卽此一念長生久視道在是也呂子豁然悟鬯然懌

已蹙然起曰師道易易若是吾將廣師旨普度世迷可乎

雲房子曰汝試爲之於是度數千人乃復化身過諸所度

者之門則數千人一旦去盡呂子失意悵然而歸偃息河

濱樹下雲房子化叟曰吾非若輩比時老且衰百念俱灰

自矢可身相許矣願依子終身可乎呂喜晚得叟卽許諾

負之渡河以歸至河中始悟其爲師驚訝曰嘻師惟度我

山西通志卷一百六十一
我惟度師耶

附錄 鍾離簡咸陽人爲郎中與弟俱入華山得道白日昇天 鍾離權生而奇異美髯俊目身長八尺餘棄世事入縣東四十里正陽洞修鍊登仙 附錄南宗 劉哲字元英號海蟾子一名操明經事燕王劉守光爲相雅喜性命欽崇黃老一日有道人自稱正陽子來謁海蟾待以賓禮道人爲演清靜無爲之宗金液還丹之要竟索雞卵十枚金錢十文一文置几上累十卵於金錢若浮圖狀海蟾驚曰危哉道人曰居榮祿履憂患其危殆甚盡以其錢劈破擲之辭去海蟾大悟解印從道遁迹終南山下丹成尸解有白氣自頂門出化鶴冲天 新興古志海蟾廣陵人爲遠相後改名海今廣靈卽

古廣陵縣也

張用成號紫陽天台人

一云興安州人遇海蟾

得金丹訣治平中訪扶風馬默處厚於河東授以所著悟真篇元豐五年夏趺坐而化壽九十有九 石泰號

杏林岐山人嘗有德於紫陽紫陽授以金丹訣著書見

道書全集

薛道光一名式一名道原字太源陝府雞

足山人

一云閩州人

嘗爲僧法號紫賢一號毗陵禪師雲遊

長安宋徽宗崇寧五年丙戌冬寓郟遇石杏林傳授口

訣真要乃註解悟真篇作復命篇及丹髓歌行世壽一

百十四歲尸解

陳楠號泥丸閩人受金丹訣於紫賢

著書見道書全集

白玉蟾卽葛長庚也號紫清瓊山

人受金丹訣於泥丸著上清武夷二集綺錯瀾翻今行

於世嘗曰吾從老年得手詔封紫清明道真人

純陽通傳海蟾

紫陽杏林紫賢泥丸紫清是之謂南宗志稱正陽累雞卵葢正陽引其端而純陽實傳之也 附錄

北宗 王嘉字知明號重陽子京兆咸陽人嘗醉於甘河會二人授修真口訣時年四十有八所遇者唐呂純陽化身也再遇於醴泉嘉趨拜之邀嘉飲嘉問其鄉閭年姓答曰濮州人年二十一而不告其姓留秘語五篇令嘉讀畢焚之且曰速去東海投譚捉馬俄失所在後領馬銍等住寧海州崑崙山將沒謂門人曰丹陽已得道長真已知道吾無慮矣處機所學一聽丹陽處元長真當管領之又顧處機曰此子異日地位非常必大開教門者也書物外親眷詩奄然而逝馬銍嗣其教與譚劉邱相繼為宗盟今全真學者稱鍾呂劉為三祖又以嘉為祖師元至元六年贈重陽全真開元真君其遺文

全真前後韜光集行於世 馬銍字宜甫寧海州人金世宗大定七年七月王嘉抵寧海邀館於私第初宜甫夢其園一鶴從地湧出嘉至同擇地立菴嘉指鶴起之處命名曰全真全真之名始此宜甫執弟子禮嘉名之曰銍字元寶號丹陽子 譚玉來見嘉固請為弟子嘉名以處端字通正號長真子 王處一聞嘉至來謁師禮之後嘉飛葢致其名號名處一號華陽子 郝昇賣卜於市嘉入其肆背而坐焉昇曰請公頭回嘉應聲曰君何為不回頭耶遂執弟子禮賜名曰璘號恬然子又號太古 邱處機棲霞人年十九聞嘉在全真菴投謁於齋次嘉知其為遠器贈以詩賜名處機字通密號長春子 劉處元字通妙師重陽後贈長生輔化明德真

人 孫氏馬鈺妻名不二號清靜散人五月五日王嘉

令燒誓狀

純陽傳重陽重陽傳劉邱譚馬郝王孫號一花開七葉是之謂北宗長春嗣教最盛號龍

門派今直省道觀胥龍門派也純陽重陽世次太遠按純陽呈鍾離雲

房生在儒家遇太平懸纓重滯布衣輕誰能世上爭名

利臣事玉皇歸上清得火龍真人劍法昔年曾遇火龍

君一劍相傳伴此身天地山河從結沫星辰日月任停

輪須知本性綿多劫空向人間歷萬春昨夜鍾離傳一

語六天宮殿欲成塵送鍾離雲房赴天池會詩得道未

來相見難又聞東去上仙壇杖頭春色一壺酒頂上雲

攢五嶽冠飲酒龜兒人不識燒山符子鬼難看先生去

後身須老乞與貧儒換骨丹獻鄭思遠施真人二仙詩

萬劫千生到此生此生身始覺飛輕拋家別國雲山外

鍊魄全魂日月精比見至人論九鼎欲窮大藥訪三清

如今獲遇真仙面紫府仙翁得姓名又詩因看崔公入

藥鏡令人心地轉分明陽龍言向離宮出陰虎還於坎

位生二物會時為道本五方行盡得丹名修真道士如

知此定跨赤龍歸玉清參黃龍機悟後呈偈棄却瓢囊

撼碎琴如今不戀水中金自從一見黃龍後始覺從前

錯用心

鍾離雲房崔公今入藥鏡存鄭思遠施真人當屬唐時人

贈陳處士詩青霄

一路少人行休話興亡事不成金榜因何無姓氏玉都

必是有仙名雲歸入海龍千尺霜滿長空鶴一聲深謝

宋朝明聖主解書丹詔詔先生哭陳先生詩天網恢恢

萬象疎一身親到華山區寒雲去後留殘月春雪來時

問太虛六洞真人歸紫府千年鸞鶴老蒼梧自從遺却

先生後南北東西少丈夫

陳處士陳先生胥指陳希贈夷也宋太祖太宗時人

滕宗諒詩華州回道人來到岳陽城別我遊何處秋空

一劍橫謁石守道詩高心休擬鳳池遊朱紱銀章寵已

優欲待禍來名欲滅林泉養法預為謀

滕宗諒石介搖宋仁宗時人

頭坏歌君不見洛陽富鄭公說與金丹如盲聾執迷不

悟修真理焉知潛合造化功又不見九江張尚書服藥

失明神氣枯不知還丹本無質翻餌金石何太愚又不

見三衢趙樞密叅禪作鬼終不識修完外體在何邊辯

捷語言終不實

富弼趙抃宋神宗時人

又神宗元豐中呂惠卿守

單州天慶觀七月七日有異人過書二截句於紙四海

孤遊一野人兩壺霜雪足精神坎離二物君收得龍虎

丹行運水銀野人本是天台客

賓石橋南畔有舊宅石橋

者洞也

父子生來有兩口

呂

多好歌笙不好拍

吟

張天覺

為相日有藍縷道人及門求施天覺不知禮敬因戲問

道人有何仙術答以能捏土為香天覺請試為之須臾

烟罷道人不見但留詩於案上云捏土為香事有因世

間宜假不宜真皇朝宰相張天覺天下雲遊呂洞賓

呂惠

卿張商英宋哲宗徽宗時人

又徽宗齋會詩高談濶論若無人可惜

明君不遇真陛下問臣來日事請看午未丙丁春金大

定三年過故里詩余自金鑾謁帝回首陽鄉國暫歸來

羣迷不識吾家趣何日重尋閬苑媒其它時代名位不

著暨雜出諸傳記者不具錄朱子亦言南渡前相傳人

士多遇呂洞賓蓋其氣未散南渡後乃稀見之重陽以

金大定六年至寧海州崑崙山而生四十有八歲始遇

濮州人計其始生當在宋徽宗時然則純陽重陽之授受豈所謂六合之內存而不論者邪志之以畧具顛末張復灃州人柳宗元龍城錄復飽書帙作條山集三十卷論世外事此人兼得神鬼趣隱不仕有文集行於世

侯神仙虞鄉人從師道清觀資性篤實人稱憨子師令汲水見一異童輒與戲失期被師笞侯以實告師授以鐵針紅線令簪童頂侯如命童歸入葡萄架下掘地獲人參形如童師烹於釜中下山訪友侯聞異香竊食之盡棄餘汁於犬師歸大怒將予杖侯與犬竟飛去

陸禹臣字服休河東人避黃巢亂入南嶽得仙術隱宜州北山後尸解為紫府仙伯嘗寓吳道生家與語塵外理贈詩曰露下瑤簪濕雲生石室寒星壇鸞鶴舞丹竈虎龍蟠

宋

柴通元閩鄉人為道士於承天觀年百餘歲善辟穀長嘯惟飲酒言唐末事歷歷可聽真宗祀汾陰召至行在命坐問以無為之要賚茶藥束帛詔還本觀

金

劉志淵字海南萬泉人事親至孝夙慕仙道自號元冲子後遇長春真人於棲遊菴避兵綿山雖萬騎蹂踐獨不懼害壽七十九歸真

元

李純夫燕山人弱冠登進士不樂仕進棄官為黃冠卜隱王官谷構了了菴於貽溪之上菴後建白雲洞自號孤雲子有秦無隅者純夫高弟子也無隅弟子有古村之關希哲

山西通志 卷一百六十一
太平之李道微皆以道行著純夫大德二年卒年五十八
儒學教諭賈履信爲之贊

舊志謂純夫唐時人元宗召之不起誤

薛元曦字元卿河東人徙貴溪年十二辭家入道龍虎山師
張留孫吳全節延祐間用薦召見侍祠制授大都崇真萬
壽宮提舉陞提點上都崇真萬壽宮泰定元年扈從灤陽
還至龍虎臺喟然而歎卽日辭歸闢清寧齋見心亭熙明
軒築瓊林臺於龍虎山之西日與學仙者相伴其間而密
修大洞迴風混合之道至正三年制授弘文裕德崇仁真
人佑聖觀住持兼領杭州諸宮觀遣弟子攝其事五年卒
年五十七自號上清外史著上清集樵者問會梓羣賢詩
文爲瓊林集元卿負才氣尤長於詩揭曼碩留瓊林月餘

齋三日乃爲作序稱其老勁深穩如霜松雪檜百折莫能
撓清拔孤峻如豪鷹俊鷲千呼不肯下蕭條閒遠如空山
流泉深林孤芳自形自色不與物競人以爲知言元卿工
書人爭斲得之聞風者或使圖其像以去見心亭後有土
阜人稱薛公墩

女冠王教山舊籍關中遇焦處士旋棄家攜子息學道遍遊
名山習服氣煉形訣最後寓蒲甚久年大耋黥髮丹顏無
疾奄逝有解弢傳行於世

董鐵驢萬泉人通遁術行步如飛倏忽數百里後尸解仙去
明

張三丰平陽人一云猗氏人有仙骨修髯如戟膚如冰雪途
遇麻姑教以服四味龍芽後遊武當山登祝融峰嚼梅花

山西通志 卷一百六十一
滿口朗誦南華秋水篇觀潮上日出大叫曰雲海盪吾心
胸題楊州瓊花詩云璫枝玉蒂屬仙家未識人間有此花
清致不沾凡雨露高標猶帶古煙霞歷年既久何曾老舉
世無雙莫浪誇幾欲載回天上去擬從博望借靈槎蓋自
况也明太祖咨以時務曰惟本忠孝後成祖遣尚書胡濙
物色之終莫能得

房居士臨晉人名景圓號睡松子少精書算主案牘被督喟
然歎曰人生如朝露何自苦辱如此遂棄家入中條山修
道閉關十一年糧絕出山止宿虞鄉村扁鵲廟中夜有真
人口授先天真訣遂往汾北麻衣山默坐二十一年移居
平陽之姑射山洞虎狼皆馴伏旬月不炊爨巡撫于謙問
休咎笑而不答謂弟子曰無結果卒如其言人有訪者先

知輒避去太守胡睿叩之曰老農無所知也成化甲辰三
月十五日沐浴端坐書十勸文皆教人忠孝語書畢臥化
先是洞中有石牀二左右對峙唐時得道者臥化塑其屍
於左至是塑居士屍於右

楊攀桂丹桂蒲州人好釋老家言兄弟偕隱終南山其子屢
饋扉屨遂入深山不出又數年鄉人有見於京都者云
大陳小陳猗氏太清觀道士叔侄也得顛術常夏月碾麥戲
語人曰日烈甚宜入碾中避之遂入碾後寢神遊一日題
詩壁間止留空室莫知所往

高籙猗氏人常於孤山採藥遇劉海蟾授長生訣坐臥一窰
寒暑不出後村人欲斃池忽出曰此萬古利也當為若置
石授人一鞭入山驅石若飛石今存後卒妻子俱失所在

張神仙崇禎間至蒲州主侍郎張廣多幻術士人欲遣妓亂之須臾隱入壁中自是不知所往以上仙

晉

佛圖澄事見晉書嘗卓錫於中條白石寺炊粥無具寄米於屠牛釜中人嫌其染腥污臟澄乃出腸浴於泉至今泉上有血絲痕嘗畜一驢一猫食乏則遣驢駝帖乞糧村舍猫踞驢背或有要奪者猫卽投地變虎人莫敢近今猫驢塚猶存寺前後卒於鄴宮寺

隋

神尼名智山蒲坂劉氏女少出家有戒行沉靜寡言談吉凶成敗皆驗文帝誕日忽至其所名帝爲那羅延且曰兒不可處俗間遂割宅爲般若寺將帝躬自撫養一日尼出付

帝於其母母視帝頭忽出二角投之地尼心動急歸抱之曰何驚吾兒使晚得也後周滅二教尼隱楊氏戒行不改隋初重興佛法每以神尼爲言歿後卽葬寺中爲起金浮圖又命王劭作傳改所居般若寺爲大興國仍令天下舍利塔內各作神尼像

曇延蒲州棲巖寺僧猗氏侯王卓之後年十六身長九尺餘垂手過膝目光外射初聞講涅槃經悟旨詞辨優贍有薛居士者學總元儒聞而謁之言謔相高戲題方圓動靜四字命延體之延應聲曰方如方等城圓如智慧日動則識波浪靜類涅槃室薛驚歎曰由來所未見希世挺生卽斯人也開皇間旱命延禱之甘雨大注臨終遺啟云法王御世最荷深恩護持三寶始終莫二言訖而逝

山西通志 卷一百六十一
慧海姓張氏虞鄉人曇延弟子也年十八講涅槃文旨洞曉
周建德中竄入陳隋初文帝姊成安長公主欽其德望立
伽藍靜法寺居之仁壽前文帝頻頒璽書分布舍利每感
異祥大業二年卒於寺見高僧傳

唐

志寬河東人博覽諸經以涅槃地論爲心要時邑多虎暴都
督張遜命禱之患遂息貞觀中蒲晉早寬曝烈日中須臾
大雨闔境霑足

道慈姓張氏虞鄉人曇延度爲弟子晚住蒲州仁壽寺大業
末因事返京夜停關首主見慈馬壯勾盜欲竊之夜往其
所乃見十人圍繞環甲執兵乃合面歸懺焉唐貞觀中有
請講涅槃者堅不受請人不解告之曰所以固辭者恐不

終此席耳後果念經三日卒於山年七十有五卒經夕異
花披地湧出莖長二尺許色甚鮮榮折納餅中逾年不萎
見高僧傳

靈潤俗姓梁虞鄉人依靈燦法師住興善寺年十三初聽涅
槃卽通文旨後聞泰岳靈巖寺僧規清肅乃杖策尋焉貞
觀中與法侶登山野燒四合衆皆奔惟潤安行顧語曰心
外無火火實自心謂火可逃無由免火及火至潤燬餘自
歛後住弘福寺僕射房元齡稱歎曰居宗揚化惟此一人
也見高僧傳

神迥臨晉人俗姓田貞觀間流化岷峨爲道俗宗師

普寂姓馮氏蒲州河東人少時遍尋高僧學經律時神秀在
荊州玉泉寺寂乃往師事凡六年神秀奇之盡以其道授

焉久視中則天召神秀至東都神秀因薦普寂乃度爲僧
及神秀卒天下好釋氏者咸師事之中宗制令代神秀統
法衆開元十三年勅於都城居止王公士庶競來禮謁嚴
重少言遠近尤重之二十七年終於興唐寺年八十九時
都城士庶曾謁者皆制弟子服有制賜號大照禪師及葬
河南尹裴寬衰麻列於門徒之次士庶傾城哭送閭里爲
空

慧旻字元素河東人著十誦私記十三卷又僧尼行事三卷
尼衆羯磨二卷菩薩戒義疏四卷見唐藝文志

五代

僧善住河東普救寺寺初名西永清院漢乾祐元年招討使
郭威督諸軍討李守貞周歲城未下召善問之對曰將軍

若發善心城必克矣威折箭爲誓異日城破不戮一人遂
易今名

宋

重宣姓趙氏虞鄉人河中開元寺僧幼穎異十五禮文澈師
爲沙彌二十一依澄暉受具戒振錫遊方剗心求法凡讀
大藏經一萬餘通誦佛頂真言三十萬過秋官貳卿寇公
準重其行薦之帝庭賜紫方袍以旌其德咸平四年四月
庚戌示寂楊億撰塔記

元

月公普救寺僧精於戒律弘教大師慧印嘗從之學圓覺了
義

明

山西通志 卷一百六十一
洪濟禪師猗氏靈巖寺僧有道行演通大小乘法遊金陵明
太祖登極前風雨彌旬上不懌募有能止者洪濟應詔杖
錫一呪卽便開朗上大悅爲印經一藏給傳以歸

福登號妙峰七歲祝髮依蒲坂萬固寺郎和尚習瑜伽法初
不識經典苦行於中條讚歎寺閉關立禪三年尋見永明
禪師聽講楞嚴卽解悟無不通曉渡海謁普陀回住五臺
山龍翻石刺舌血書華嚴一部修建無遮道場神宗聞而
嘉之賜繡冠繡衲真來佛子之號移錫蘆芽造萬福鐵塔
鑿萬福石洞峩崿造銅殿二五臺一華山一俱莊嚴精妙
太原建浮圖於郡城左慈聖后佐以金錢塔成雙峙名曰
宣文後歸臺山坐逝遣中常侍賜祭葬

以上釋
遼州

五代

妙惠節度使王建女賜紫號嚴因大師智超建孫賜紫號妙
果大師胥有道行

明

洪樹遼州人幼蒙倏穎悟諸品經義無不洞曉人呼聖僧後
住持香林寺禁步二年一日談經而化

子端榆社人蚤歲祝髮雲遊晚歸值時艱捐金建上下城敵
樓以成保障人胥義之

沁州

上古

錢鏐帝顓頊之孫陸終氏之中子封於彭城故稱彭祖初聞
上黨黎城九仙女有道行往師之得導引行氣術隱雲母

山西通志 卷一百六十一
山時游沁州南里或云葬里中彭家溝今墓存

周

琴高真人列仙傳云趙人以鼓琴爲宋康王舍人行涓彭之術浮遊冀州及涿郡間二百餘年後辭入涿水中取龍子與諸弟子期曰皆潔齋待於水旁設祠果乘赤鯉出坐祠中且有萬人觀之留月餘復入水去今沁源東卽寓居地也

按史記索隱曰戰國策呂氏春秋皆云宋王偃謚康王

唐

韓湘子修武人韓愈之從孫十二郎之子也嘗於沁州南八里修鍊建塔一鄉人立祠祀之

風雷將軍姓焦氏武鄉人唐懿宗朝父爲掾吏有陰行咸通

九年生將軍七歲不語兩手不展父母欲棄之忽元日手展能言性穎異及長凡天文地理易象遁甲咸臻其妙景福元年夜夢日華貫頂有道者送石匣曰此天真賜汝也覺而開視皆龍文虎篆莫能辨識焦秘而藏之遇異人指授兼賜龍璽寶劍各一遂能軼風駕霧鞭笞鬼神出入幽顯無礙會上黨妖祲爲災往除之事聞賜號風雷將軍卒年三十四金加封昭澤龍王

金

閻真人名密沁源縣吏棄俗學道結菴於紫金山居二十餘年尸解大定中賜額名其菴曰太清觀後延樓煩薛道紀居之有道行

元

山西通志 卷一百六十一
唐善慶沁源人薛道紀之徒得師奧旨以救人爲事延祐二
年事聞勅賜金襴紫服和光大師

明

呂雲仙沁州人成化間修真元妙觀善黃白術觀中像胥點
金飾之徒張道元索其術不授會雲仙入山道元力索之
卒不授以死道元返荷鍤往瘞至則屍無存矣

王威沁州人習苦行子處花山巔晨夕焚誦人莫知其道術
嘉靖戊寅忽示衆化期里社始驚異如期雲集威辭衆入
巖結趺坐須臾白氣上冲神遂往數日如生里人就真
身塗飾之後知州俞汝爲扣其遺蛻硜硜有金玉聲撰王
仙傳以上仙

唐

先師菩薩名侶相傳懿宗第三子僖宗弟也黃巢入長安出
奔五臺祝髮爲僧遊沁源靈空山見林木深茂人迹罕至
有馬跑泉之異卓錫居焉昭宗景福二年圓寂宋太宗端
拱二年賜所居寺額曰聖壽

金

基公靈感院僧性濶達衣鉢外不留一物嘗造叢塚瘞尸四
萬五千有奇壽七旬餘卒大定癸未詔增廣伽藍特賜院
額曰靈感

明

海貴栢林寺僧武鄉人性純樸篤志焚修供水陸者五檢藏
經者二襲師衣鉢積貯頗豐悉捐之萬曆十四年正月命
其徒持佛號曰吾將去矣危坐而化

國朝

普汰號純如沁州靈泉寺僧戒律精嚴兼通文翰順治間遊都城

御書佛字賜之知州汪宗魯建

御書樓於寺圓寂前十日手書素扇十柄徧遺知交展之胥歸家頌也比衆至已遊矣

性休號尺木俗姓朱大同人幼補弟子員善詩文工草隸值闖賊之變棄家雲遊戊子始薙髮於雩之龍坑菴從崆峒戒子傳衣鉢遊漢口遇不退禪師棒喝悟道卓錫於沁之永慶寺歲癸巳正月日早齋畢忽乞十王殿前地於院主院主允之遂趺坐而逝夜半復甦索筆書塔銘曰卜地卜地三上之三乘時乘時二月之二萬彙萌芽造化順理一

稼反生吾道乃逆遇雷而鳴逢火出世至二月二日出定沐浴扶至塔前對衆說偈擲杖而化著有銅鞮語錄以上釋

平定州

唐

李賓諱通元又號長者宋熙寧元年七月宗勝撰長者行蹟云唐李長者皇枝也諱元童碑記皆作通元但言滄州人開元七

年至太原孟縣大賢村有高山奴延納安居長者每日惟食棗十顆栢葉餅子一枚不交外人掩室獨處含毫臨紙曾無虛時如是三稔一日捨山奴至馬家谷古佛堂自構土室寓於其側端坐宴然於斯十年後復囊挈經書遵道而去次冠蓋村忽逢一虎馴伏長者告以吾欲著論釋華嚴經可與吾擇一棲止處言畢虎起徐而撫之遂將所挈

山西通志 卷一百六十一
經囊掛於虎背於是虎望神福山原直山二十餘里當一
土龕收囊於內龕之四旁舊無澗泉長者始來之夕風雨
暴作拔去一松化爲一潭僭陽之歲祈求必應長者製論
之夕心窮元奧出白光以代燈燭居山之後忽有二女子
容華絕世皆可笄年俱服布衣悉以白巾幪首姓氏居處
一無所言汲水焚香供給淨饌莫知所止歷有五祀著論
將終遂爾絕迹長者身長七尺二寸廣眉朗目丹唇紫肌
長髯美茂修臂圓直髮采紺色毛端右旋殊妙之相靡不
具足首冠樺皮身披蓐衣長裙博袖散腰而行居常跣足
放曠人天忽一日出訪舊止之里適值野人聚族合樂長
者曰汝等好吾欲將歸衆乃必謂却還滄州揮淚懇留長
者曰縱在百年會當歸去於是衆送還龕所復衆曰去住

常然汝等可各還家翌日長叟結徒禮候但見姿容端儼
已坐化於龕中報齡九十有六時當三月二十八日也

元

郭罕然孟縣人寓平定州之娘子關至山中見一洞水流飛
瀑而下罕然入洞得異書遂善遁法或令入瓶呼之輒內
應碎之片片皆應人咸怪之

平定州志作
明洪武初人

劉八郎孟縣人有道士授異書遂通遁術相傳至揚州歸飯
猶未熟云

明

劉偉朝邑人正德間舉人任文水令擢監察御史陞兗州知
府得仙術尸解相傳隱平定山中爲人推命奇中平定甄
給事成德李知府愈爲諸生時從之遊初會城陳中丞琳

嘗與同臺巡按兗州親弔其喪及家居識諸市疑其仙也呼來飲酒話舊密報當事至者接踵論休咎胥驗後不知所往

國朝

還陽子姓郭氏名靜中修武人幼時嘗夢驅龍爲行雨狀差長棄家適華陰遇異人授以金丹五雷法由是號還陽嘗往來晉趙燕齊豫章楚粵間歲旱當事輒走書數百千里迎禱雨還陽以掌中雷印據案擊則霹靂應聲大雨如注求者衆第書符付之符甫入境雨隨集藁城苦河患以法鎮之河徙數里歷城趵突泉涸以鐵符券三納之泉復出後過壽陽太安鎮曰此去西北里許有吾容足處遂定居五峰山之龍泉菴順治初年近百歲顏色如童子一日呼

門人具浴浴畢端坐而逝

以上仙

元

普惠平定人號洞雲住壽聖寺能詩有戒行與中書左丞呂思誠爲方外友呂嘗作洞雲歌贈之及呂北上惠貽詩曰君王若問榆關郡地瘦民貧山水多後徙獅子山石巖下年九十八化今名其地曰禪巖

明

讓大師號衲空一號罕峰相傳爲陝右人筮仕長吏後棄官雲遊得佛法於五臺山達觀禪師遂棲獅子窟與憨山海印妙峰輩五十三人爲淨友達觀示寂乃卓錫方山之昭化院戒行精嚴工吟咏晉潘二藩雅敬之萬曆中賜爲紫衣大師嘗貯粟於掌鳥雀馴集掌上就食後無疾跣趺而

化

淨大師號道圓卓錫風溝之關帝廟頻夢關聖一日謂弟子曰三日後亟備龕具至期沐浴坐化以上釋

忻州

北魏

智仙姑永安間副尉智重顯女幼耽空寂年及笄不嫁禍福多前知問之不語一日入山坐化建塔藏之今東南山曇陽寺有仙姑塔

元

王志常忻州人幼時牧牛田間遇異人挈之而行遽至河南天壇之陽臺宮後八年來歸父母驚喜疑其死而復生遂度為天慶觀道士氣質渾厚信受道之器年近九十留頌

而逝見元好問天慶觀記

李之和元真觀道士博學工詩嘗與元遺山李牛臺賡和人謂其有仙風道氣云

五公者天公地公宋公退公窮公莫知所從來愛聖阜之勝各就一山修鍊迄今以五仙名洞名鄉五公名寨以上仙

唐

釋元奘卽三藏緱氏人俗姓陳名禕年十一誦維摩法華慕大法達長安住莊嚴寺西踰劔閣達蜀都受諸經論一聞不忘遍遊荆揚訪道復還京輦貞觀三年奉勅往西域取經六百餘部十九年還京住玉華寺翻譯經藏後奘如臺山覽勝往來定襄弔藏孤故址建保孤祠徜徉白鹿原而去麟德元年告其僧眾曰有為之法必歸磨滅泡影形質

何得久停行年六十五必卒玉華曷葬我於白鹿原尋果
逝兩月而色貌不變弟子以奘遺命移葬焉今其墓尚存
土人呼和尚圍

打地和尚傳心要於江西馬祖退隱定襄縣往來深山與虎
豹羣居踪跡神異有問佛法者以杖三打地或匿其杖而
問焉則開口而已唐大曆中跣趺入滅葬酈村塔宋張商
英撰記

宋

舍利和尚慶曆四年至橫山興國寺作院主每日吾欲焚身
特需其候明年正月十八果用三昧火自焚得舍利數粒
鄉人建塔勒碑識之

金

懶牧和尚忻州人住興國寺戒行精嚴後僧從南方來彌獲
聞深密諦天德中書偈而逝茶毗得舍利建塔城西原有
見其杖錫相隨者云

慧英和尚號木菴居龍門山寶應寺有精行趙王欲見之英
先覺命徒曰當負我出山至金門寺回視則山崩矣其徒
負至端坐而寂

元

法空漢川人俗姓古出家遊忻州依懶牧和尚居萬安禪院
日誦寫華嚴經元大德中微疾誨徒出頌畢奄然而逝茶
毘得舍利十餘粒

了空忻州人姓王氏幼神異年二十遠遊後出家華蓋寺能
前知嘗遇僧云修行當學最上乘前知特小乘法耳又數年

遂大徹悟一夕作偈曰無物本來真身心何處尋人法雙
亡却虛空現法身遂逝茶毘烟騰五色衆異之以上釋

代州

五代

劉鉉英號海蟾子燕廣陵人明經擢第仕燕爲相雅喜性命
之學一日道士來謁待以賓禮問姓名不對自稱正陽子
海蟾師事之道士授丹訣海蟾棄官易服從之至秦州陶
真於秦華終南之間復南游楚尚書郎李觀自言爲進士
時過潭州至亭買酒忽一人荷竹奩持釘鉸具徑至問觀
曰聞君將之南嶽頗識養素先生藍方否觀曰固將往見
之其人曰奉煩寄聲劉處士十月懷胎如何出得言訖去
觀至南嶽訪方具道其語方怒然驚歎曰吾不遇此命也

所謂劉海蟾者也吾養聖胎已成患無術以出之非斯人
不足成吾道今聲聞相通而不得接吾道不成矣觀急回
訪於潭州已失所在後隱代州之鳳凰山遊歷名山所至
多遺跡丹成尸解有白氣自頂門出化鶴去元至正六年
詔贈明悟弘道真君

宋

闕道寧雁門人號休休子幼爲釋已而學道養真於鳳凰山
之來儀觀年八十四尸解

劉妍代州嫗見宋曾慥集仙傳

金

姬志元高平人號崇道大師洞明子先住遼沁又嘗留宿五
臺邑人築環堵居之積十五年觀成額曰明陽

元

梁思問字辨疑崞縣朝元觀羽士也敏慧通文為元門所宗嘗與元好問遊

王朴字淳甫遼東廣寧人貞祐初以行省員外郎督餉至崞因家焉乃創道館於州西北隅扁其軒曰虛白辟穀修真一時士夫如元遺山內翰李封龍輩皆造其廬推重之語見遺山山行紀因紀其一絕云歲花空自老消息更誰知到此輕塵利功名自可遺以上仙

漢

摩騰法蘭中印度二尊者永平七年正月孝明夜夢金人身高丈餘赫奕如日來詣殿廷旦令占之傅毅對曰臣覽周書異紀云西方有聖人出其沒千載教當及此所夢無乃

是乎上遣王遵等十八人西訪至月氏遇二尊者延請東還以釋迦文佛畫像並經四十二章進披氎覩像果與夢符上以預夢告騰蘭對曰此如來以大法來囑願勉之上問此土豈無居化地耶對曰此土有五臺乃文殊大士所居攝化無量天龍鬼神然非戒定澄神莫能覩也至次年春禮清涼山回奏請鼎建伽藍復言山形宛同印度靈鷲山寺宜即用為名上以始信化緣加大孚靈鷲寺仍度僧數十居之五臺化宇自此興矣

北魏

靈辨懸甕山沙門熙平初頂戴華嚴日夜行道於五頂之間足破血流曾無少怠一夕松下坐忽爾心光凝湛見異比邱摩其頂曰子勤苦且久當以信心入三摩地矣自是一

山西通志 卷一百六十一
切文字觸目冰釋造華嚴論一百卷孝明帝請於式乾殿
敷揚奧旨宰輔重臣皆北面而聽後終於清涼

東魏

曇鸞大師雁門人年十四卽出家內外經籍及四論佛性彌
極窮研讀大乘經詞義深密因爲注解成疾周行醫療行
至汾州城東門忽見天門洞開由斯疾愈欲繼前作顧而
言曰命危脆不常江南陶隱居者方術所歸遂往從之旣
達梁朝屆隱居所接對欣然授以仙方十卷還至江有鮑
郎子神者一鼓湧浪七日師以情祈告帖然安靜達魏辭
往名山依方修法後至潞州逢三藏菩提留支師請曰佛
法中頗有長生不死法勝此土仙經者乎支卽以觀經授
之曰修此當得解脫生死也師卽受行調心鍊氣對病結

緣流靡弘廣魏主重之號爲神鸞勅令住并州大寺晚移
住石壁元中寺魏興和年卒卒之日天樂西來異香滿室
因出調氣論又撰禮淨土十二偈續龍樹偈安樂集兩卷
廣流於世仍自號爲有魏元簡大士云

隋

解脫和尚代州邢氏子卅歲於臺山昭果寺披剃從抱腹山
志昭禪師叅學昭甚器之尋返昭果晝誦大乘夜則禪觀
嘗於東臺麓見草衣比丘跣趺石上卽前叩首比丘指金
蓮花解脫顧之卽失比丘久之復現半身語曰夫解脫者
當求諸已而由人乎於是狂機頓歇深契大法普度垂五
十餘年後莫知所終

唐

山西通志 卷一百六十一
三
窺基俗姓尉遲鄂國公敬德侄也童年依元奘法師披剃永徽甲寅年十七特旨度爲大僧叅譯經論過目成誦從柴師受瑜伽唯識宗旨著論百本窺基每遇出載經書食饌盈三車時呼三車法師永隆中遊五臺棲托一載奉詔旋京明年將順世告其徒曰十方刹海遊戲之場堯率故苑吾將歸矣跌坐而逝御製像讚悼之

道宣律師吏部尚書錢申之子母夢日輪貫懷而生少事習誦長扣元關嘗遊清涼至中臺夜方禪寂有天童子侍於右曰我名元暢乃天人也聞師屆此故來相候道宣曰聖人境界果何在耶答曰師不聞一法無異三人殊見者乎蓋隨其業報所見各異若某見清涼山則碧琉璃色諸臺麓皆雜寶林至菩薩住處非我所及知也言訖而隱

清涼國師澄觀字大休會稽人姓夏侯氏生於開元戊寅身長九尺四寸垂手過膝口四十齒目光夜發晝乃下眴天寶七載出家至德二年受具詔入內譯華嚴大曆三年又詔入內與大辯正三藏譯經爲潤文大德旣而辭入五臺駐錫大華嚴寺博覽六藝圖史九流異學竺經梵字及四圍五明聖教世典等書靡不該洽自是筆無停思著述華嚴無間貞元十二年上遣河東節度使禮部尚書備禮迎入京同闕賓般若三藏翻譯烏茶國所進華嚴旣就進之上大悅賜紫方袍號教授和尚十五年授鎮國大師四月上誕節勅有司備儀輦迎入內殿闡揚華嚴宗旨旋賜號清涼開成三年三月六日圓寂澄觀生歷九朝爲七葉師春秋一百有二後人尊爲華嚴六祖文宗輟朝三日奉全

山西通志 卷一百六十一
身塔於終南山未幾有梵僧到闕奏稱葱嶺見二使曰北
印土文殊堂神也東取華嚴菩薩大牙歸國供養有旨啓
塔果失一牙唯三十九存焉遂闍維得舍利光明瑩徹舌
如紅蓮建塔號清涼國師妙覺之塔相國裴休奉勅撰塔
銘碑記

隱峯姓鄧氏邵武人幼不慧父母聽其出家初遊馬大師門
復來往石頭後於馬祖言下契悟冬居衡嶽夏住清涼唐
元和中路出淮西屬吳元濟阻兵隱峰曰吾當爲解紛乃
擲錫空中飛身而過兩軍鬪心頓息遂入五臺於金剛窟
前將示寂先問衆曰諸方遷化坐去臥去吾嘗見之還有
立化者否曰有還有倒立而化者否曰未之見也乃倒立
而化衆昇就茶毘屹然不動隱峰有妹爲尼乃拊而咄曰

老兄疇昔不循法律死更惑人以手推之憤然而踣遂就
闍維收舍利塔於北臺之頂

從諗禪師曹州郝鄉人姓郝氏幼於扈通院從師披剃未納
戒便抵池陽叅南泉言下悟理乃往嵩嶽琉璃壇納戒仍
還南泉復往趙州觀音院嘗九遊五臺每到必經夏而返
一日復束裝有僧作偈留之云正眼觀時非吉祥從諗擄
住曰作麼生是正眼僧無對負囊便行繇此道化遠被幽
晉間唐乾寧四年仲冬二日枕右脇而逝壽一百二十歲
謚號真際大師

太原孚上座蜀人久住臺山後遊浙閩復回臺山不出者二
十餘年諸方胥目爲太原孚上座

宋

山西通志 卷一百六十一 仙釋
慧悟大師唐李氏子纔學語卽稱妙法蓮華其親異之捨令
出家於五臺真容院戒律精嚴儀容奇偉元祐初詔入內
庭應對稱旨賜紫衣授職僧正崇寧改元復詔赴京苦辭
不獲行至佛道店曰旣逢佛道吾可歸矣乃屹然而化勅
還龕本山建塔藏之

僧真寶代州人爲五臺山僧正學佛能外死生靖康之擾與
其徒習武事於山中欽宗召對便殿眷賚隆縟真寶還山
益聚兵助討州不守敵衆大至晝夜拒之力不敵寺舍盡
焚帥下令生致真寶至則抗詞無撓帥不忍殺使郡守劉
駒誘勸百方終不顧且曰吾法中有口回之罪吾旣許宋
以死豈當妄言也怡然受戮北人聞見者歎異焉

成覺代州張氏子幼依善住院和希大德受業希受僧統加
號慈懿大師住清涼寺覺從諮決法要服勤三載希知其
法器勉令叅方覺聞明教嵩和尚名卽往依焉朝夕諮決
所疑廓然有得辭歸五臺嵩曰吾道北矣至山學者日衆
壽逾八十而化

金

善慧崞縣霍氏子幼願出家父母強之娶三年無染始聽詣
清涼山依成覺爲師天德間賜號宣秘大師鑄印掌教臨
終謂弟子曰吾住山以來已事未純徒爲僧務累狗輕而
遺重其德虧矣爾曹勿踵吾陋跡言訖而逝

法冲大師五臺山僧大定三年黃冠蕭守真奏請與沙門角
力上許之召法冲入京止昊天寺明日集殿庭法力勝守
真世宗嘉歎賜儀仗送至五臺勅建萬歲寺居之

山西通志 卷一百六十一
蘇陀室利中印度那蘭陀寺僧慕清涼文殊住處與弟子七
人航海而來殞者三還者三惟蘇陀室利六載始達臺山
時年八十五矣經一臺頂誦華嚴十部禪寂七日不息不
食後化於靈鷲峰弟子佛陀闍毘收舍利八合持歸西土
元

正順蔚州高氏子依臺山壽寧用公薙髮旋受具足戒頂誦
華嚴經行住不捨太后三詔不赴授五路總管堅辭不受
成宗幸山特加禮遇臨終書偈坐脫收舍利無算建塔藏
之

信明字真覺五臺清涼曠高氏子依洪公披剃年十四入講
肆二十四受大戒解孟蘭等鈔日誦大乘不少懈詔入殿
廷賜坐應對稱旨授僧統從慶壽海雲和尚咨決心要年

六十九坐化

文才字仲華隴西楊氏子博學能文纘輯慧燈集釋賢首疏
構室松下人稱松堂老人成宗特旨建寺臺山賜額大萬
聖祐國寺命主席嘗坐山三日忘歸弟子尋之始得大德
六年唱寂闍維得舍利百粒進呈勅建塔追封邽國公
慧印字弘教關西張氏子少業儒長業釋藏居太行之阿修
一相三昧七年根塵脫落皇慶元年詔至京講經於安國
寺賜紫衣香藥遣旌幢送至萬聖祐國寺至治二年英宗
幸臺山陪駕遊南臺獲嘉應賜幣及玉文殊像七寶念珠
文宗命住承天寺授一品銀印固辭至元三年示寂

唯德正定人姓孟經梵律論各探奧旨年二十至五臺遂舍
講就禪後卜居古公主寺終焉索紙筆書偈曰五十一歲

山西通志 卷一百六十一
百拙一生不肯休歇清涼石虎報三更正是還源去時節
書訖而逝

明

壁峰禪師名寶金世稱金壁峰乾州永壽石氏子母張氏好
善壁峰生六歲依雲寂溫公剃落受具謁如海真公於縉
雲遂大徹悟真授記別且囑曰昔無用和尚謂我云座下
出三虎一彪爾其彪也爾緣在北當詣朔方先是定中見
一山有招者曰此秘魔巖也後北遊五臺道逢蓬頭女子
衣弊而五彩閃爍赤足徐行一黑獒隨行問何所之答曰
入山曰入山何爲答曰一切不爲言訖而沒因就地建靈
鷲菴元至正間詔祈雨入京卽大雨贈千金逾年復詔入
值大雪夜有紅光出室中賜寂照圓明大禪師號明洪武

戊申詔赴京住天界寺賜紫衣金鉢及御製詩壬子六月
集衆言別弟子請偈曰三藏十二部尚爲故紙吾何言爲
怡然坐逝茶毗得舍利無算建塔北臺文岫山又賜詩旌
之壁峰製華嚴字母佛事梵音清雅盛行於世

具生吉祥中天竺迦維衛國人明初浮海來禮五頂閱四載
抵臺山駐錫壽安禪林洪武七年上聞其卓行詔住蔣山
開化石城聽法雲集八年春上賜詩曰談笑般若生紅蓮
十四年足疾不能行勅醫療之師附奏欲歸五臺師別衆
曰今將爲五臺之行有能從我者乎有一弟子曰某能從
師舉足曰汝無這脚安能從我至午盥沐跏趺而坐舉念
珠示弟子擲珠於地而化

大寶法王葛哩麻烏斯藏人永樂間聲聞中國太宗遣使西

土迎之應召至京封如來大寶法王西天大善自在佛性樂林泉奏辭遊五臺上賜旌幢傘蓋遣使衛送命太監楊昇重修大顯通寺居之丁亥四月制書褒賜明年師疏別入寂火化無物相傳關吏見法王適西奏上所賜玉珎云又勅楊昇塑像於顯通法堂

釋迦也夫天竺迦維衛國人永樂十二年來遊清涼冬十一月遣太監侯顯詔至京入大內免拜賜坐頒金印寶誥封大國師後辭還五臺一定七日乃起至宣廟尤加崇禮六年辭歸西域

覺澄號古溪山後蔚蘿人族姓張氏年十歲爲牧童十四從雲中天暉出家閱藏五載從默菴坐禪大興隆寺景泰三年宗伯胡濙命往南陽香嚴寺自維大事未明不一年而

退登太山叅月溪往西蜀楚山於投子山機緣相投朝夕入室山謂海雲曰香嚴只是聰明見解道機未明在山往安慶看頌古聯珠集見趙州凌行婆機緣往返豁然有省因思本叅無字話頭如何不徹奮然一拶虛空迸碎身與僧堂泯然不見再看無字話頭火中覓雪了然無疑越五日山自安慶回謂海雲曰香嚴大事今番徹也明日正旦召衆曰作者今有其人良久曰香嚴是也覺澄避席曰覺澄不會佛法山曰我正要不會佛法的遂以法付之天順五年住金陵高座寺不復出示寂於成化初

淨澄禪師西河張氏子誕時適二僧到門曰此兒非常應名清正後出家行至雙城於路逢僧爲落髮卽初命名者也尋遊五臺僧清美爲易名徧叅悟古宿天順初返清涼代

山西通志 卷一百六十一
王建普濟寺居之後脫化於寺有山居詩傳世
寶印禪師初與楚峰玉堂同叅臨行大川和尚授以讖曰同
去三人載一車後至臺山蛇溝三人同結菴遂成叢林蛇
溝俗名車溝也將入滅說偈辭衆逝

德清字澄印全椒人族姓蔡氏年十二辭親入報恩寺與雪
浪恩並事無極法師內江趙文肅公摩其頂曰人天師也
德清以江南習氣軟暖宜入春冰夏雪苦寒不可耐之地
以痛自磨厲飄然北邁參徧融笑岩偕妙峰登樓北臺之
龍門老屋數椽在萬山水雪中日尋緣溪橫釣危坐其上
忽然忘身衆籟闐寂身心湛然如大圓鏡大事旣徹光明
四照慈聖后建祈儲道場於五臺與妙峰實主其事光宗
應期降誕德清乃棲東海之牢山慈聖遣使再徵不能致

布金造寺賜額曰海印丙申坐私造寺院戍雷陽成楞伽
筆記居五年住錫曹溪甲寅披剃返初服於是東遊吳越
赴紫栢之葬於雙徑弔蓮池於雲棲結菴廬山五乳峰下
專修淨業居四年復往曹溪示微疾沐浴焚香集衆告別
危坐而逝天啟三年之十月也弟子奉全身歸五乳塔而
藏焉後二十年復奉其龕歸曹溪將荼毗啟視之膚理柔
輒鬚髮郁然乃加髹漆於六祖真身之側云

真可字達觀世居吳江太湖之濱族姓沈氏五歲不語有異
僧摩頂曰此兒出家當爲人天師遂能言年十七仗劍遊
塞上行至蘇州遇雨宿虎邱僧舍聞僧夜誦八十八佛名
心大說侵晨卽解腰纏十餘金授僧設齋剃髮二十從講
師受具戒參張拙秀才偈頭面俱腫一日忽悟腫處頓消

自是凌轍諸方嘗曰使我在臨濟德山座下一掌便醒安用如何若何過匡山窮相宗奧義游五臺時書詩偈禪林競傳之至京叅徧融笑巖歸吳復楞嚴廢寺於嘉禾剗刻藏緣於徑山再入燕訪憨山於東海復戒壇於檀栢西遊峩峩下瞿塘過荆襄登太和憇匡廬復歸宗古寺謂人曰海印不歸我爲法一大負礦稅不止我救世一大負傳燈錄不續我慧命一大負捨此一具貧骨釋此三負不復走王舍城矣先是遊石徑山得琬公所藏貯佛舍利慈聖后迎入內供三日特賜紫伽黎神宗手書金剛經汗下漬紙遣近侍質問偈答曰御汗一滴萬世津梁無窮法藏從此放光上覽之大喜及妖書獄起逮入詔獄下所司訊而執政者意在鈎黨欲牽連殺之索浴說偈堅坐而逝癸卯之

十二月也又十二年葬於徑山茶毗之日肉身儼然舍利無算云

國朝

清涼老人阿王老藏俗姓賈順天西山人十歲出家十八受具順治癸巳攝齋受戒西天上士諦視曰此中有五臺主人衆皆惛然泊己亥果以兼通番漢選主五臺年七十退居長坐不臥康熙癸亥秋

駕幸臺山

御筆題賜爲清涼老人年八十有七口誦佛號端坐而逝

老藏丹貝蒙古人入衛籍爲趙氏順治庚子掛錫五臺冲澹踈朗解文義工翰墨

聖祖仁皇帝西巡獎賚有加旣而入都請改建菩薩大殿遂卒

山西通志 卷一百六十一
龕歸山 以上釋

解州

周

關令尹喜解人善內學常服精華隱德修行時人莫知老子西遊喜見紫炁知有真人當過物色而遮之果得老子老子亦知其奇為著道德經五千言授之後與老子俱遊流沙化胡采芑勝實莫知其所終尹喜亦自著書九篇號曰關尹子

漢

王喬河東人顯宗世為葉令喬有神術每月朔望常自縣詣臺朝帝怪其來數而不見車騎密令太史伺望之言其臨至輒有雙鳧從東南飛來於是候鳧至舉羅張之但得一

隻舄詔上方診視則四年中所賜尚書官屬履也每當朝時葉門下鼓不擊自鳴聞於京師後天下玉棺於堂前吏人推排終不搖動喬曰天帝獨召我耶乃沐浴服飾寢其中蓋便立覆宿徙葬於城東土自成墳其父縣中牛皆流汗喘乏而人無知者百姓為立廟號葉君祠牧守每班錄皆先謁拜之祈禱輒應違犯亦能為祟帝迎取其鼓置都亭下略無復聲焉或云此即古仙人王子喬也

晉

石鐘真人芮城人姓陳氏隱於北山石室中室頂懸石狀如鐘故曰石鐘真人一日有蟾負芝草來止石上真人視之曰我聞食芝草即輕舉然有損於蟾吾不忍為後蟾復置芝草於地因取而食之又有野鹿入洞同宿及來京鹿負

行李隨之夜夢神人告曰此鹿乃龍也今大旱禱雨爾其收榜黎明收榜入靜室中焚香默禱俄而雲布雨足明日官屬來謝則真人已與鹿冉冉而上昇衆皆以手加額焉羅王峰夏縣人爲瑤臺觀開山師世傳其得道爲立祠有碑記

唐

侯道華芮城人初河中永樂道淨院有道士鄧太元鍊藥貯院內道華在院供給使常好子史手不釋卷或問要此何爲答曰天下無愚懵仙人咸大笑之一旦失之無所見惟脫雙履衣挂松上中留一詩云帖裏大還丹多年色不移前宵盜食却今日碧空飛慙愧深珍重珍重鄧天師他年鍊得藥留得與內芝吾師知此術速鍊莫爲遲三清專相

待大羅的有期下列細字曰去年七月一日蒙韓君賜姓李名內芝配住上清善進院時大中五年五月也方驗道華竊太元藥仙去節度鄭公先以其事聞詔賜昇仙觀咸通三年芮令高立暮於道華降生之地築臺刻石撰降生臺記

宋

朔峯頭夏縣人世居邑北五十里高德大溝上有木橋後出遊方外至明正德間有峯頭道人至橋自稱姓朔指宅墓故址且言確曰胡不見鄉人掘地三尺許得之居數月備耕張鸞家後倏不見

金

何南卿字東夫本蜀閬城挹秀坊御史之裔博極羣書精義

山西通志 卷一百一十一
理學值亂俘於北金大定丁酉設貢舉於平陽中選得免
俘然絕意仕進往來汾晉從黃冠師宋披雲名爲志淵號
清真子授以講衍之職披雲卒朝命提點永樂純陽宮賜
紫衣號淵靖大師至大辛亥卜居芮城中條山水谷創樂
全觀年九十一無疾卒著南華經註十三卷水谷代腹七
卷

李寶安邑人小字三十冬夏披中衣寒暑不侵談笑遊塵市
見者輒獲利人圖其像以爲利市神金大定二十年詔賜
方外衣不受朝退失履而去自燕至安邑二千餘里不二
日還遺詩見藝文
劉飲水安邑人居西紐延祥觀得神仙服水法口吐金蟬化
去遺詩見藝文

元

毛道真夏縣人元至正間修養於瑤臺山旣卒門人立祠塑
像祀焉後數年自河南募緣覓小車數輛載之抵夏縣渡
河濕隻履託以具炊先行及挽車人至詢之則死已久矣
一觀大驚視祠像隻履尚濕

明

萬蓬頭嘉靖時居芮城東灘狼窩之佛窰素工談論精風鑑
堪輿術言吉凶多應婦孺皆稱爲蓬頭師至今有王老人
井遺蹟一日告人曰吾將遠行可泥封吾窰門數日啟視
如故他日又使加封固越數日復啟視空諸所有咸以爲
仙去云

絳州

山西通志

卷一百一十一 仙釋

三

漢 張鐵脚漢季遊寓聞喜善服氣冬不爐夏不扇一足能立者數日人稱爲鐵脚先生立長春觀居之

北魏

吳邵聞喜人道引養氣積年百歲神色不衰

隋

裴謚聞喜人大業中入白鹿山採鍊十數年與王敬伯爲友敬伯曰仙海無涯盍歸乎謚曰吾夢醒者不復抵迷敬伯遂遊京洛貞觀初拜叅軍遷大理評事賜緋奉使淮南舟次高郵一老人簑笠鼓棹而過敬伯視之乃謚也維舟握手延坐曰兄所須當以奉給謚笑曰魚鳥各適何矜炫爲吾市藥廣陵青園橋東數里櫻園北車門卽吾宅也敬伯

至廣陵出訪之果有車門漸進愈佳青衣傳命謚衣冠揖入棟宇器物悉非人世所覩日暮促席燃九光燈光華滿座女樂數十人皆絕色謚又顧黃頭曰王評事吾山中友別近十年宜遠致麗姝黃頭唯唯旋引一姬自西階上敬伯視之似其妻趙氏趙氏亦熟目敬伯駭異之一青衣以玳瑁筭授趙氏乃趙氏素善者敬伯取坐間殷色李投之趙氏顧敬伯潛繫衣帶間將曙謚召黃頭曰送趙夫人回乃謂敬伯曰使君宿此得無驚郡伯乎且就館間時再來敬伯去五日將還復詣之則一荒涼地也惆悵而行及京奏事畢抵第趙氏怒曰女子誠陋奈何致以悅人朱李尚在也敬伯始悟謚得仙矣

唐

司馬子微洛州溫人傳辟穀道引術無不通睿宗嘗召入掖
廷問道對曰爲道日損損之又損以至於無爲夫心目所
知見損之尚不能已况攻異端而增智慮哉上曰治身則
爾治國若何對曰國猶身也故游心於淡合氣於漠與物
自然而無私焉而天下治上喟然曰廣成之言也開元中
再召至都詔於王屋山置壇室以居善篆隸命以三體寫
老子刊正文句又命玉真公主及光祿卿韋縉至所居按
金錄設祠厚賜焉卒年八十九贈銀青光祿大夫謚正一
先生上親文其碑

裴儵然楚州刺史思訓之子開元中爲道士嗜詩酒工丹青
嘗夜醉臥街犯禁賦詩曰遮莫蓼蓼動須傾滿滿杯金吾
如借問但道玉山頽

裴航聞喜人長慶中下第遊鄂渚偶與樊夫人同載航見其
國色慕之賂侍妾裊烟以詩達意曰向爲胡越猶懷想况
遇天仙隔錦屏儻若玉京朝會去願隨雙鶴入青冥夫人
得航詩若不聞使裊烟持詩答航曰一飲瓊漿百感生元
霜搗盡見雲英藍橋便是神仙窟何必崎嶇上玉京航亦
未達詩之旨趣後經藍橋驛渴甚向老嫗求漿嫗呼女雲
英擎漿與航英色芳麗航憶夫人詩句異之願納聘焉嫗
言已有靈丹須玉杵白搗之有此當相與航購得之嫗仍
令航搗藥百日嫗吞之先入洞告姻戚來迎航及女就禮
引見諸賓一仙嫗謂航應相識否航不省曰不意鄂渚間
同舟事乎航驚怛陳謝始知夫人卽雲英之姊後航及妻
入玉峰洞爲上仙

山西通志 卷一百六十一
王刁河津人隱居龍門山得道

王先生隱王屋山常衣紙襖人呼爲王紙襖見宋曾慥集仙傳

許碯高陽人累舉不第學道於王屋周遊名山洞府每遇石崖峭壁輒題云許碯自峩崙山尋偃月子到此後上酒樓醉歌仙去

金

呂道章垣曲人金大定間爲縣吏夜夢神告以修養術寤卽避役居洪慶觀道成治疾有奇驗尋重修觀工訖解衲置黃河水面坐其上順流而去莫知所終
丁善淵垣曲人幼聰敏通經術年十六爲洪慶觀道士賜以紫衣通元號尋授法籙呵禁厲鬼胥有顯應貞祐末紀邦

北
瑞鎮守葛伯城性殘忍善淵諷諭全活者甚衆年五十八一日升几而坐召徒作歌歌竟飛昇其徒奉遺衣葬於觀

元

張志朴稷山人鍊形苦性衲衣露膝行丐汾晉間脅不占席者三十餘年一鉢之外餘無所奉城北創建洞神宮賜號淳德大師至元十四年羽化

皇志祐稷山人年四十餘投龍翔觀梁先生受度閉關三年建九陽洞於馬橋村雲溪菴於下文村預知化期年七十有三端坐而逝卽葬菴內明初地震崖崩墓見中塑一真人二仙卿侍立次四弟子相向坐有志銘以上仙

北周

檀特師名惠豐飲酒啖肉語默無常逆論來事後皆如言周文帝遣書召之檀特發至岐州會齊神武攻玉壁檀特曰豈能至龍門也神武果不至龍門而還

唐

智旻智富聞喜鐵牛峪僧唐太宗屯兵軍乏糧旻富請以沙鍋爲食餉三軍胥飽太宗神異之後勅建廣教寺以報云慧涉絳州人俗姓楊幼從知深出家日誦數千言嘗入秦寓麥積山石室造百法論抄一十六卷涸井泉應因絕筆至蜀以法殮術士妖猴還憇中條山竹林精舍造維摩搜微記畧科般若心經抄無常經真釋四分律科共二十六卷晚歸絳將化預戒衆三分其軀一投水中一投郭外一隨煨燼勿塔勿銘以違佛戒言已昇座而化茶毗獲舍利百

餘粒舌不壞色如黃金

僧法雲絳州人著辨量三教論三卷又十王三業論十卷見唐藝文志

梁

誌公聞喜南邱村有誌公寺內有石刻記相傳誌公避亂駐錫於此

宋

旻師稷山人姓邢氏初治儒術天才博瞻舉進士不第遂落髮受具遍歷名山寓錫淮泗間鴻儒碩彥多與遊目曰岸濱長老常食蔬茹衣鹿皮又號鹿皮道者後遊姑射山終焉茶毗舌根不化瑩潤若玉太原王宥撰記

元

廣裕稷山人九歲從顯公和尚祝髮後二十年得法於雲素和尚通經律論藏蔚為四眾宗世祖設資戒大會說法大內默契上心賜袈裟大德十一年示寂於金仙寺七日顏色如生樹塔以葬趙孟頫撰碑記

丁八行者稷山人初居甘泉佛窰洞與守志同規大閣塑大佛一尊高丈六尺名佛閣寺即清涼院也

明

可良徽州人嘉靖間住錫聞喜神栢村大雲寺有禪行眉覆過目面壁冥坐嘗早起遇盜於塗呵之盜終日立不能去早禱雨輒應以上釋

吉州

金

王子可吉州人字南雲父本軍校南雲亦隸籍年三十大病後忽發狂能揮筆作詩文及說世外恍惚事南渡後居上蔡遇文士則稱大成將軍於釋則諦摩龍什於道則騶天元俊於貴遊則威錦堂主人為人軀幹雄偉貌亦奇古戴青葛巾項後垂雙帶若牛耳一金鏤環在頂額間兩頰以青涅之指為翠靨衣長不能掩脛故時人有哨腿王之目落魄嗜酒每入城市人爭以酒食遺夜宿土室中人問其故其應如響其所引書皆世所無有人與之紙落筆數百言或詩或文多六經中語及韻學古文奇字壬辰兵亂為順天將領軍所得館於州之瑞雲觀南雲言於將領曰我不能住君家觀也越三日病卒後有見之於淮上者又云安邑人小字醜人遊河南鄧州鄆城鄢陵等處詩詞走筆

山西通志 卷一百六十一
如神禮部尚書趙國臣暨中州高士胥師事之遺詩見藝文

隰州

宋

邱長春隰州人建隆間隱祈真觀修鍊一日空中仙鶴繚繞駕空而昇留詩曰生死朝昏事一般幻泡出沒水常閒暉光現處躍烏兔元景開時納海山揮斥八紘如咫尺吹噓萬有似機關狂詩落筆成塵垢寄在詩人妄聽間

此與棲霞邱祖

乃二人也

曹仙媪携幼女引一犬至大寧馬鬪關息大柳下左繫鐵鞋跟已穿右握鐵杖滑如玉招水工求渡工以水漲拒媪微笑遂携女引犬步水面徑達東岸登石龕中時羣犬隨吠

居民趨視之媪與女胥示寂犬亦化矣一境大駭爲塑像祀之有禱輒應元人郝季隆有碑記

金

仙姑馬守明永和民家女母夜夢玉童駕鶴自空降於庭曰暫寄汝腹覺而有娠幼敏慧及笄不事女工曰繁華非我志也旣而父母喪謁甘泉女冠張妙清爲師居三載適絳州舍李氏越明年上元日無疾枕肱而逝三日復甦語人曰予暫遊紫府會羣真耳自是不復穀食能前知吉凶疾者不假砭藥呵禁頓愈歲旱蝗設壇密祝三日雨降蝗滅歲歉化導富室設食以賑後構菴於山林南社莊棲真養氣至至元戊寅二月望日沐浴更衣大集徒衆留一絕云七朶金蓮數暫來人世間闕功今補足紫府却歸還筆落

山西通志 卷一百六十一
端坐而逝年六十有四

明

雲峰觀道士不知姓名萬曆己酉入水簾洞內四日始出登
千百尺石崖如履平地常坐樹杪絕穀不食年許語人曰
吾遊名山遂去莫知所終

李金仁隰州人修鍊祈真觀不解衣者三年餽遺却不受移
坐瓦窰坡三年不語亦不履後復移坐洞山上 以上仙

元

普資姓李氏隰州雲強里人幼師事汾州僧淨闇廣通法論
建崇福寺趙德元記

明

大柄俗姓張隰州人七歲披剃經懺大藏胥通精醫術壽八

十無病坐化

無名僧嘉靖間住大寧縣西道家村土人房芝供養之後火
出鼻中焚其殼芝築龕瘞之

國朝

道興字聖圓俗姓胡隰州妙樓山石室僧也苦志焚修州人
請住天寧寺南遊金陵六年募兩浙總制郎造檀佛千六
十尊又遊太原汾州歸建層臺高閣為隰偉觀 以上釋

山西通志卷第一百六十

山西通志

卷一百六十

仙釋

三

山西通志 卷一百一十一
子縣西五十里方山之巔

金道華路史帝堯時有金道華種蘭

虞

古董父黃帝裔孫左傳晉太史蔡墨曰昔颺叔安有裔子曰父好龍能求其嗜欲飲食之龍多歸焉乃擾畜龍以服事帝舜帝賜姓董氏使豢龍封諸鬲川鬲川氏其後也所居地有陂澤多生蒲葦因名其里曰董澤明成化壬辰冬池水裂血鱗如鑑蓋龍蛻也今澤旁尚多董姓澤在聞喜縣東四十里

夏

劉累堯之裔嘗學擾龍於豢龍氏帝孔甲獲二龍不能食累爲飲食之帝嘉之賜氏曰御龍受豕韋之後一龍死潛醢

周

以食帝帝饗之既而使求之懼遷於魯范氏其後也

辛廖晉大夫初畢萬筮仕於晉遇屯之比辛廖占之曰吉屯固比入吉孰大焉其必蕃昌震爲土車從馬足居之兄長之母覆之衆歸之六體不易合而能固安而能殺公侯之卦也公侯之子孫必復其始

史蘇晉卜筮之史獻公卜伐驪戎史蘇占之曰勝而不吉公曰何謂也對曰遇兆挾以銜骨齒牙爲猾戎夏交捽交捽是交勝也臣故云且懼有口懔民國移心焉公曰何口之有口在寡人寡人弗受誰敢興之對曰苟可以懔其入也必甘受逞而不知胡可壅也公不聽遂伐驪戎克之獲驪姬以歸有寵立以爲夫人卒致禍亂後筮嫁伯姬於秦遇

歸妹之睽史蘇占之曰不吉其繇曰士刲羊亦無益也女承筐亦無貺也西鄰責言不可償也歸妹之睽猶無相也震之離亦離之震爲雷爲火爲羸敗姬車說其輶火焚其旗不利行師敗於宗邱歸妹睽孤寇張之弧姪其從姑六年其逋逃歸其國而棄其家明年其死於高粱之虛及秦穆公伐晉獲惠公明年歸惠公而質其太子圉又八年惠公卒文公入殺懷公於高粱言胥驗焉

卜偃晉掌卜大夫獻公伐虢圍上陽問於卜偃曰吾其濟乎對曰克之公曰何時對曰童謠云丙之晨龍尾伏辰均服振振取虢之旂鶉之賁賁天策焯焯火中成軍虢公其奔其九月十月之交乎丙子旦日在尾月在策鶉火中必是時也冬十二月丙子朔晉滅虢虢公醜奔周後襄王出居

于鄭文公將納王使卜偃卜之曰吉遇黃帝戰于阪泉之兆公曰吾不堪也對曰周禮未改今之王古帝也公曰筮之遇大有之睽曰吉遇公用享于天子之卦戰克而王饗吉孰大焉且是卦也天爲澤以當日天子降心以逆公不亦可乎大有去睽而復亦其所也卒納王殺太叔晉侯朝王王饗禮命之宥

卜招父梁太卜惠公之在梁也梁伯妻之梁嬴孕過期卜招父與其子卜之其子曰將生一男一女招曰然男爲人臣女爲人妾故名男曰圉女曰妾及子圉西質妾爲宦女焉董因晉臣秦伯納晉文公因迎公於河公問曰吾其濟乎對曰歲在大梁將集天行元年始受實沈之星也實沈之虛晉人是居所以興也今君當之無不濟矣君之行也歲在

大火大火闕伯之星也是謂大辰辰以成善后稷是相唐
叔以封瞽史記曰嗣續其祖如穀之滋必有晉國臣筮之
得泰之八曰是謂天地配享小往大來今及之矣何不濟
之有且以辰出而以參入皆晉祥也而天之大紀也濟且
秉成必霸諸侯子孫賴之君無懼矣

史援趙史初趙盾夢見叔帶持要而哭甚悲已而笑拊手且
歌盾卜之兆絕而後好史援占之曰此夢甚惡非君之身
乃君之子然亦君之咎至孫趙將世益衰後盾卒子朔嗣
爲屠岸賈所誅趙氏絕十五年景公立盾孫武

桑田巫晉人景公夢大厲被髮及地搏膺而踊曰殺余孫不
義余得請於帝矣壞大門及寢門而入公懼入於室又壞
戶公覺召桑田巫巫言如夢公曰何如曰不食新矣六月

丙子晉侯欲麥使甸人獻麥饋人爲之召桑田巫示而殺
之將食張如廁陷而卒

巫臯梗陽人荀偃夢與厲公訟弗勝公擊墜其首戴而奉之
以走見臯他日見諸道與之言同臯曰惟有事於東方則
可以逞偃許諾乃請悼公伐齊師還偃痺疽生瘍於頭卒
繁人晉弓工平公使爲弓三年乃成公引之射不穿一札公
怒將殺之其妻請見具言射法公如其言射穿七札繁人
得出錫金三鎰

師曠字子野晉樂師審聲知音時稱多聞平公會諸侯同討
不庭齊侯畏晉師之衆脫歸夜曠告公曰烏烏之聲樂齊
師其遁果如其言楚人伐鄭乃曰無害吾驟歌北風又歌
南風南風不競楚必無功旣而果然

山西通志 卷一百一十一
師涓晉樂師呂氏春秋晉平公鑄大鐘工皆以爲調矣師曠
曰不調後世有知音者將知鐘之不調也臣竊爲君耻之
至於涓而果知鐘之不調也

史趙史墨史龜皆晉史宋公伐鄭晉趙鞅卜救鄭遇水遇火
占之諸史史趙史墨史龜曰是謂沈陽可以興兵利以伐
姜不利子商伐齊則可敵宋不吉史墨曰盈水名也子水
位也名位敵不可干也火帝爲火師姜姓其後也水勝火
伐姜則可史趙曰鄭方有罪救鄭則不吉不知其他乃止
姑布子卿見趙簡子簡子徧召諸子相之子卿曰無爲將軍
者簡子曰趙氏其滅乎子卿曰吾嘗見一子於路殆君之
子也簡子召子毋卹毋卹至則子卿起曰此真將軍矣簡
子曰此其母賤翟婢也奚道貴哉子卿曰天所授雖賤必

貴自是之後簡子盡召諸子與語毋卹最賢簡子乃告諸
子曰吾藏寶符於常山上先得者賞諸子馳之常山上求
無所得毋卹還曰已得符矣簡子曰奏之毋卹曰從常山
上臨代代可取也簡子於是知毋卹果賢乃廢子伯魯而
以毋卹爲太子

蓋聶榆次人善擊劍荆軻嘗遊過榆次與聶論劍聶怒而目
之軻出人或言復召荆卿聶曰曩者吾與論劍有不稱者
吾目之試往是宜去不敢留使使往之主人軻已駕而去
榆次矣使者還報聶曰固去也吾曩者目攝之

漢

衛綰大陵人以戲車爲郎事文帝仕至丞相

吾邱壽王趙人年少以善格五召待詔仕至大中大夫

山西通志 卷一百一十一
子輿儀長孺皆西河人馬援上馬式表曰昔有騏驎一日千里伯樂見之昭然不惑近世有西河子輿亦明相法子輿傳西河儀長孺長孺傳茂陵丁君都君都傳成紀楊子阿臣援嘗師事子阿受相馬骨法考之於行事輒有驗效長孺又見尚友錄

魏

正始前有沙門學相遊懷朔舉目見人皆有富貴之表以爲必無此理燔其書而後皆如言乃知相法不虛也

晉

崔懿之屯留人精相法與崔游友善劉元海遊上黨懿之見而驚顧語游曰此人非常大貴元海聞其善相引至別所解衣觀之當心有三赤毫長三尺六寸懿之拜曰鬚與此

齊則表裏相應大貴通矣元海稱尊號辟懿之起家中書監

公孫彧襄陵人與屯留崔懿之皆善相及見劉淵驚相謂曰此人形貌非常吾所未見也於是深相崇敬推分結恩後淵稱尊號果如所言

郭公客居河東精於卜筮郭璞從之受業公以青囊中書九卷與之

郭璞字景純河東聞喜人受郭公青囊中書遂洞五行天文卜筮之術禳災轉禍通致無方雖京房管輅不能過也惠懷之際避地東南抵將軍趙固會固所乘良馬死固惜之不接賓客璞至門吏不爲通璞曰吾能活馬吏驚入白固固趨出曰君能活吾馬乎璞曰得健夫二三十人皆持長

山西通志 卷一百一十一
六
竿東行三十里有邱林社廟者便以竿打拍當得一物宜
急持歸得此馬活矣固如其言果得一物似猴持歸此馬
死便噓吸其鼻頃之馬起奮迅嘶鳴食如常不復見向物
至廬江太守胡孟康被丞相召爲軍諮祭酒時江淮清晏
孟康無心南渡璞爲占曰敗康不之信璞將促裝去之愛
主人婢無由而得乃取小豈三斗繞主人宅散之主人晨
見赤衣人數千圍其家就視則滅甚惡之請璞爲卦璞曰
君家不宜畜此婢可於東南二十里賣之慎勿爭價則此
妖可除也主人從之璞陰令人賤買此婢復爲符投於井
中數千赤衣人皆反縛一一自投於井璞攜婢去後數旬
而廬江陷璞過江宣城太守殷祐引爲叅軍時有物大如
水牛灰色卑脚脚類象胸前尾上皆白大力而遲鈍來到

城下祐使人伏而取之令璞作卦遇遯之蠱其卦曰艮體
連乾其物壯巨山潛之畜匪兇匪虎身與鬼并精見二午
法當爲禽兩翼不許遂被一創還其本墅按卦名之是爲
驢鼠卜適了伏者以戟刺之深尺餘遂去不復見郡綱紀
上祠請殺之巫云廟神不悅曰此是邾亭驢山君鼠使詣
荆山暫來過我不須觸之其精妙如此祐遷石頭督護璞
隨往時有鼯鼠出延陵璞占之曰此郡東當有妖欲稱制
者尋亦自死矣後當有妖樹生然若瑞而非瑞辛螫之木
也儻有此者應在東南數百里期明年矣無錫縣歛有菜
萸四株交枝而生若連理者其年盜殺吳興太守袁琇或
以問璞璞曰卯爻發而沴金此木不曲直而成災也王導
嘗令作卦璞言公有震厄可命駕西出十里得一栢樹截

山西通志 卷一百六十一
斷如身長置常寢處災可消導從其言數日果震栢樹粉
碎璞葬母卜地暨陽去水百步許人以近水言璞曰當卽
爲陸矣其後沙漲去墓數十里皆爲桑田璞嘗爲人葬帝
微服往觀之因問主人何以葬龍角此法當滅族主人曰
郭璞云此葬龍耳不出三年當致天子也帝曰出天子邪
答曰能致天子問耳帝甚異之璞素與桓彝友善彝每造
之或值璞在婦間便入璞曰卿來他處自可徑前但不可
廁上相尋耳恐客主有殃彝後因醉詣璞正逢在廁掩而
觀之見璞裸身被髮銜刀設醮璞見彝撫心大驚曰吾每
屬卿勿來乃更如是非但禍吾卿亦不免矣璞終嬰王敦
之禍彝亦死蘇峻之難敦收璞將斬之璞謂行刑者欲何
之曰南崗頭璞曰必在雙栢樹下旣至果然復去此樹應

有大鵲巢衆索之不得璞更令尋覓果於枝間得一大鵲
巢密葉蔽之初璞中興初行經越城間遇一人呼其姓名
因以袴褶遺之其人辭不受璞曰但其後自當知其人遂
受而去至是果此人行刑初庾翼幼時嘗令璞筮公家及
身卦成曰建元之末邱山傾長順之初子凋零及康帝初
將改元爲建元或謂庾冰日子忘郭生之言邪邱山上名
此號不宜用冰撫心歎恨及何充改元爲永和庾翼歎曰
天道精微乃當如是長順者永和也吾庸得免乎其年翼
卒冰又令筮其後嗣卦成曰卿諸子並當貴盛然有白龍
者凶徵至矣若墓碑生金庾氏之大忌也後冰子蘊爲廣
州刺史妾房內忽有一新生白狗子莫知所由來其妾秘
愛之不令蘊知狗轉長大蘊入見狗睂眼分明又身至長

而弱異於常狗蘊甚怪之將出共視在衆人前忽失所在
蘊慨然曰殆白龍乎庾氏禍至矣又墓碑生金俄而爲桓
溫所滅褚裒總角詣庾亮亮使璞筮之卦成璞駭然亮曰
有不祥乎璞曰此非人臣卦不知此年少何以乃表斯祥
二十年外吾言方驗及二十九年而康獻后臨朝有司以
哀后父議加不臣之禮璞之占驗皆如此類也璞門人趙
載嘗竊青囊未及讀而爲火所焚

王叔和高平人爲太醫令博通經史洞識修養之道精診切
纂岐伯華陀等書撰脉經辨最詳張仲景作傷寒論文字
錯簡未易序次求得叔和彙撰始成全書見唐甘伯宗名
醫傳考

王顯并州人景明四年公孫崇表頃蒙付并州民王顯進所

獻古銅權稽之古範考以今制鐘律準度與權參合昔造
猶新始創若舊異世同符如合規矩

北魏

祁纖河東人好相人世祖賢之拜爲上大夫

郭善明甚機巧當文成時北京宮殿多其製作

范甯兒善圍棋孝文時曾與李彪使齊齊令江南上品王抗
與對甯兒制勝而還

高崇祖恒州人善天文每占吉凶有驗永安中特除中散大
夫

北齊

王春河東安邑人少精易占明陰陽風角齊神武引爲館客
韓陵之戰四面受敵從寅至午三合三離將士皆懼神武

山西通志 卷一百一十一 九
將退軍春叩馬諫曰比至未時必當大捷遽縛其子詣軍門爲質若不勝請斬之賊果大敗後從征討恒令占卜其言多中位東徐州刺史賜爵安夷縣公

張遠遊河東人有道術齊文襄別置館京師而禮接焉

北周

龔儁字僧儁太原陽邑人也性沉謹善隸書特工模寫太祖引爲記室時侯莫陳悅阻兵隴右太祖志在平之乃令儁僞爲魏帝敕書與費也頭令將兵助太祖討悅儁依舊敕模寫及代舍人主書等署與真無異太祖大悅費也頭已曾得魏帝敕書及見此敕不以爲疑遂遣步騎一千受太祖節度大統初除丞相府城局參軍封長安縣男邑二百戶從復弘農戰沙苑進爵爲子出爲華州中正十三年遷

襄洛郡守尋徵教世宗及宋獻公等隸書儁以書字所興起自蒼頡若同常俗未爲合禮遂啓太祖釋奠蒼頡及先聖先師除黃門侍郎累遷撫軍將軍右金紫光祿大夫都督通直散騎常侍車騎大將軍儀同三司世宗二年以本官爲大使巡歷州郡察風俗理冤滯還拜小御正尋出爲湖州刺史性靜退每以清約自處前後所歷頗有聲稱尋加驃騎大將軍開府儀同三司改封昌樂縣伯又進爵爲侯增邑并前一千六百戶

隋

銅川府君善筮開皇四年文中子始生筮之遇坤之師爲上德而居下位之兆曰是子必能通天下之志遂名曰通北山黃公善醫先寢食而後鍼藥汾陰侯生善筮先人事而

後說卦

唐

李淳風太原人僑雍父播隋高唐尉棄官爲道士有文學自號黃冠子注老子撰方志圖文集十卷並行於代淳風幼俊爽博涉羣書尤明天文曆算陰陽之學貞觀初以駿傅仁均曆議多所折衷授將仕郎直太史局尋上言渾天儀宜改造太宗異其說令造之至貞觀七年成加授承務郎十五年除太常博士尋轉太史丞預撰晉書及五代史其天文律曆五行志皆淳風所作也又預撰文思博要二十二年遷太史令太宗嘗密召淳風訪以武氏秘記淳風言其兆已成因勸無殲疑似太宗善其言而止淳風每占候吉凶合若節契當世術家疑有神相非學習可致然竟不

能測也顯慶元年以修國史功封昌樂縣男復詔與筭學博士梁述助教王真儒等注五曹孫子十部算經令國學行用龍朔二年改授秘閣郎中又增損劉焯皇極曆改撰麟德曆代戊寅曆術者稱其精密咸亨初還爲太史令年六十九卒撰典章文物志乙巳占秘閣錄並演齊人要術等十餘部多傳於代子該孫仙宗並爲太史令

狄梁公性爛醫藥尤妙針術顯慶中應制入關路由華州闌闐之北稠人廣衆聚觀如堵狄梁公引轡遙望有巨牌大字云能療此兒酬絹千疋卽就觀之有富室兒年可十四五臥牌下鼻端生贅大如拳石根蒂綴鼻纔如食筋或觸之酸痛刻骨於是兩眼爲贅所繩目睛翻白痛楚危亟頃刻將絕惻然久之乃曰吾能爲也其父母洎親屬叩顙祈

請卽輦千絹置於坐側公因令扶起卽於腦後下針寸許
仍詢病者曰針氣已達病處乎病人領之公遽抽針而朮
贅應手而落雙目瞪亦如初曾無病痛其父母親眷且泣
且拜則以縑物奉焉公笑曰吾哀爾命之危逼吾蓋急病
行志耳吾非鬻伎者也不顧而去

邱延翰聞喜人永徽時遊太山於石室中遇神人授玉經卽
海角經也洞曉陰陽依法扞擇罔有不吉開元中爲縣人
卜葬地星氣交現太史奏曰河東聞喜有異氣朝廷忌之
遣使斷其所扞山詔捕之大索勿得詔原其罪詣闕陳陰
陽之說以天機等書進呈秘以金函玉篆號八字天機拜
亞大夫之官祀山仙祠

唐彬茂太原人有前知術高宗時老臨死封一狀詒其妻曰
吾死後年名垂拱卽詣闕獻之慎勿開也垂拱初其妻獻
之狀中預陳唐室易周及突厥至趙定事後皆驗

韓凝禮上黨人明易學撰著奇中明皇如京命凝禮撰一著
翅立三起二偃凝禮曰此龍飛之象未占有孚應在仲冬
一陽動也後果驗凝禮起家五品潘炎爲之賦曰維彼神
著生而有知用知不測明以稽疑擢九尺之織幹伏千年
之寶龜德圓而神兮無幽不及其生三百兮其用五十惟
聖人之觀象乃神動而鬼入列八卦以效變翹孤莖而子
立數彰得一命乃自天同大橫之有夏表或躍而在田其
察也深其功也大稱美名於神物齊妙用於神蔡是曰元
后茲爲筮從氣受陰陽夜分而彩露兼涵幽贊天地朝覆
而輕雲數重著而有靈立定天保可謂神助用光天造功

山西通志 卷一百六十一
深莫善仲尼且許以鈎深屈於不知太公徒言乎腐草著
之立兮發其祥吾君得之尊以光明乎太極演彼歸藏因
卜祝之符瑞應天人之會昌

衛大經解梁人以文學聞常閉門絕人事周知天文曆象窮
冥索元後以壽終墓於解梁之野開元中天水姜師度奉
詔鑿無鹹以漑鹽田剗室廬潰邱墓甚多既至衛先生墓
前發其地得一石刻字爲銘曰姜師度更移向南三五步
蓋先生之詞也師度異其事命工人遷其河遠先生之墓
數十步

管涔隱者隱於管涔山李德裕掌記北門隱者謂之曰君明
年當在人君左右爲文翰之職須值冲主德裕聞之愕然
變色隱者亦悔失言避席求去德裕問何爲對曰君有宿

緣其年秋登朝至明年穆宗纘緒召入禁苑

荆浩唐末沁水人善畫世稱荆關董巨爲畫家正宗其山水
節要曰凡畫山水意在筆先丈山尺樹寸馬豆人此其法
也遠人無目遠樹無枝遠山無皴高與雲齊遠水無波隱
隱似有此其式也山腰雲塞石壁泉塞樓臺樹塞道路人
塞石分三面路分兩岐樹看頂額水看岸基此其訣也凡
畫山水尖峻者峰平夷者嶺峭壁者崖有穴者岫圓形者
巒懸石者巖兩山夾水者澗夾路者壑水注川者溪泉通
川者谷路下平土山者坡似土而高者阪若能辨別乎此
則知山水之彷彿也觀者先看氣象後辨清濁定衆峰之
揖拱列羣岫之威儀多則亂少則漫不多不少要分遠近
遠山不得連近山遠水不得連近水山要迴抱水要滌迴

山西通志 卷一百一十一
茂林古寺樓觀可安斷岸頽堤小橋宜置有路處人行無
路處林木岸絕處古渡山絕處荒村水濶處征帆林密處
店舍懸崖古木根露而藤纏臨流怪石嵌空而水痕凡作
林木遠則踈平近則森密有葉者枝柔無葉者枝硬松皮
似鱗栢皮纏身生於土者修長而勁直長於石者拳曲而
伶仃古木節多而半死寒林慘淡以蕭森凡畫山水須按
四時春景則霧鎖烟橫樹林隱隱山色堆青遠山拖藍夏
景則林木蔽天緣蕪平阪倚雲瀑布近水幽亭秋景則水
天一色霞鷺齊飛雁橫烟塞蘆渚沙汀冬景則卽地爲雪
水淺沙平凍雲匝地酒旗孤村漁舟倚岸樵者負薪風雨
則不分天地難辨東西行人傘笠漁父蓑衣有風無雨枝
葉斜披有雨無風枝葉下垂雨霽則雲收天碧薄靄依稀

山光淺翠網晒斜暉曉景則千山欲曙輕霧霏霏朦朧殘
月氣象熹微暮景則山啣落日犬吠踈籬僧投遠寺帆卸
江湓行人歸急半掩柴扉或烟斜霧橫或遠岫雲歸或秋
江古渡或荒塚斷碑或洞庭春色或瀟湘霧迷如此之類
謂之畫題筆法布置更在臨時山形不得重犯樹頭不得
整齊樹藉山以爲骨山藉樹以爲衣樹不可繁要見山之
秀麗山不可亂要顯樹之光輝若能留意於此顧心會於
精微

王方慶雅有才度博學多聞篤好經典精於藥性活人無算
裴元證河東人通儒術該曉圖讖

五代

馬重績字洞微少學數術明太乙五紀八象三統大曆居於

山西通志 卷二十一
太原唐莊宗每征代必問之所言無不中拜大理司直晉高祖起太原被圍勢甚危急命重績筮之遇同人曰天火之象乾健而離明健者君之德也明者南面而嚮之所以治天下也同人者人所同也必有同我者焉易曰戰乎乾乾西北也又曰相見乎離離南方也其同我者自北而南乎乾西北也戰而勝其九月十月之交乎是歲九月遼助晉敗唐軍天福初拜太子右贊善大夫遷司天監明年張從賓反命重績筮之遇隨曰南瞻析木水不自續虛而動之動隨其覆歲將秋矣無能爲也七月而從賓敗賜良馬器幣三年重績上言曆象王者所以正一氣之元宣萬邦之命而古今所紀考審多差宣明氣朔正而星度不驗崇元五星得而歲差一日以宣明之氣朔合崇元之五星二

曆相參然後符合自前世諸曆皆起天正十一月爲歲首用太古甲子爲上元積歲愈多差濶愈甚臣輒合二曆創爲新法以唐天寶十四載乙未爲上元雨水正月中爲氣首司天監趙仁錡等言明年庚子正月朔用重績曆考之皆合乃下詔頒行之號調元曆重績又言漏刻之法以中星考晝夜爲一百刻八刻六十分刻之二十爲一時時以四刻十分爲正此自古所用也今失其傳以午正爲時始下侵未四刻十分而爲午由是晝夜昏曉皆失其正請依古改正從之重績卒年六十四

宋

苗訓河中人善天文占候之術仕周爲殿前散員右第一直散指揮使顯德末從太祖北征訓視日上復有一日久相

摩盪指謂楚昭輔曰此天命也夕次陳喬太祖爲六師推戴訓皆預白其事旣受禪擢爲翰林天文尋加銀青光祿大夫檢校工部尚書年七十餘卒子守信

馮文智并州人世以方技爲業太平興國中詣都自陳召試補醫學加樂源縣主簿端拱初授少府監主簿逾年轉醫官加少府監丞嘗隸并代部署淳化五年府州折御卿疾文智診療獲愈御卿表薦之賜緋加光祿寺丞咸平二年明德后不豫文智侍醫旣愈加尚藥奉御賜金紫六年直翰林醫官院東封轉醫官副使祀汾陰又加檢校主客員外郎大中祥符五年卒

薛化光絳州正平人善數術嘗以平晉策于太宗行在召見罷歸適子奎始生撫其首曰是子必至公輔後果執政云

苗守信訓子少習父業補司天曆算尋授江安縣主簿改司天臺主簿知算造太平興國中以應天曆小差詔造新曆及成賜號乾元曆頗爲精密優賜束帛雍熙中遷冬官正端拱初改太子洗馬判司天監未幾轉殿中丞權少監事立本品之下俄賜金紫至道二年上以梁雍宿兵令宰相召守信問以天道咎證所在守信奏曰臣仰瞻元象及推驗太一經曆宮分其荆楚吳越交廣並皆安寧自來五緯陵犯慧星見及水神太乙臨井鬼之間屬秦雍分及梁益之間民罹其災水神太一來歲入燕分歲在房心正當京都之地自茲朝野有慶詔付史館明年真授少監咸平三年卒子舜卿爲國子博士

高若訥并州榆次人彊學善記因母病遂通醫書雖國醫皆

屈伏張仲景傷寒論訣孫思邈方書及外臺秘要久不傳
悉考校訛謬行之世始知有是書名醫多出衛州皆本高
氏學焉

張德明字顯道襄陵人性不喜華飾精醫術常施藥救人尤
急於貧困遠近求者無虛日太原提刑种師道來求醫應
手而愈師道悅遂以朝廷所降妙應大師勅旨易而與之
因酬其功

張騃字公度潞州人家世業醫騃尤精於方脉意在活人不
責其報黃魯直母安康郡君病秘結諸醫不能治騃投餌
卽愈魯直感而厚贈之却不受
都嚮進士陵川人博學通醫徽宗時官宣議郎掌太醫院事
遠邇求診應手愈能以其術鳴

僧懷丙正定人巧思出天性非學所能至河中府浮梁用鐵
牛八維之一牛且數萬斤後以暴漲絕梁鐵牛沒於河募
能出之者懷丙以一大舟實土夾牛維之用大木爲權衡
鈎牛徐去其土舟浮牛出轉運使張燾以聞賜紫衣
馬遠其先河中人後居錢塘工山水人物花鳥種種臻妙獨
步畫院光寧兩朝授待詔子麟能世家學然不逮父遠愛
其子多於已畫上題作麟畫蓋欲麟得譽故後爲畫院祇
候

元

孫威渾源人幼沉鷲有巧思元初雲中來附守帥表授義軍
千戶從軍攻潞州及鳳翔皆有功善爲甲嘗以意製蹄筋
翎根鎧以獻太祖親射之不能徹大悅賜名也可兀蘭佩

山西通志 卷一百一十一
以金符授順天安平河南平陽諸路工匠都總管太祖嘗問諸將衣其甲者曰汝等知所愛重否諸將對皆失旨太祖曰能捍蔽爾輩以與我國家立功者非威之甲耶而爾輩言不及此何也復以錦衣賜威每從戰伐民有橫被俘戮者輒以蒐簡工匠爲言而全活之卒贈中奉大夫武備院使神川郡公謚忠惠

孫拱威之子巧思如其父嘗製甲二百八十襲以獻至元十一年別製疊盾其製張爲盾斂則合而易持世祖以爲古所未有賜以幣帛二十二年除武備少卿大都路軍器人匠都總管元貞九年爲益都路總管兼府尹卒於官贈大司農神川郡公謚文莊

田忠良字正卿趙城人僑中山通儒家雜家言嘗識太保劉

秉忠於微時秉忠薦之世祖視其狀貌曰是雖以陰陽家進必將爲國用俄指西序第二人曰彼手中握何物曰雞卵視之果然又曰朕有事縈心曰當是一名僧病耳上曰然國師也命秉忠試星曆遁甲諸書諸生皆罕及詔授太史官上曰朕用兵襄樊累年不決對曰在酉年矣至元十一年元帥阿里海牙請益兵十萬渡江上密問曰汝試筮之濟否曰濟上御幄殿曰今拜一大將取江南朕心已定果何人邪忠良環視左右目一人曰是偉丈夫可屬大事上笑曰此伯顏也七月十五夜白氣貫三台曰三公其亡乎尋劉秉忠卒獵御林駐輦曰朕有所遺曰其數珠乎明日二十里外當有持之來獻者已而果然上問南征將士能渡江否忠良曰明年正月當奏捷至期果取鄂州嘗以

違和問曰聖體行自安矣閱月愈賜銀五百兩與丞相和禮霍孫視山陵俄叛兵圍三匝忠良引衆夜歸敵殊不覺和禮霍孫以爲神上賜黃金十兩皇子北平王那木罕丞相安童征海都奏曰不吉及諸王昔里吉刼入海都命忠良致禱曰無庸皇子未年當還後果然駕駐龍興北奏曰宿衛士日食一瓜豈能充饑上俾均其食汴梁河清三百里上曰憲宗生河清朕生河又清今河復清何邪曰應在皇太子命爲太常丞少府爲諸王昌童建宅忠良仆其柱曰太廟前豈諸王建宅所邪上曰卿言是也又曰太廟前無馳道非禮也卽敕闢道或請太廟牲不用牛忠良曰梁武帝用麩爲犧牲後如何邪將征日本奏曰海隅何足勞天戈不聽武宗初進司徒奏冬至祀天請以太祖配夏至

祭地請世祖配制可皇慶初卒封趙國公謚忠獻

靳德進潞州人祥子爲人材辨幼讀書通大義父歿益自刻勵尤精星曆之學太保劉秉忠選授天文星曆卜筮三科管勾凡交蝕躔次六氣禳疹所言休咎輒應時因天象進規諫多所裨益累遷秘書監掌司天臺事從征乃顏揆日時率中機會嘗陳天道好生請緩師以待其降又奏宜括天下術士設陰陽教官使訓學者仍歲貢一人從之著爲令成宗撫軍北邊德進從行凡攻戰取勝皆豫尅期日無不驗者成宗初歷陳世祖進賢納諫咨詢治亂之原上嘉之授昭文館大學士知太史院領司天臺事或請以瓦易都城苦廩德進曰若是役驟興物必踴貴議遂寢敕中書自今凡集議政事必使德進預焉尋丐閒仁宗在東宮特

令中書留之上召見白海行宮授中書右丞議通政院事
領太史院如故以疾卒追封魏國公謚文穆

劉致字時中河東人官翰林待制風情高簡蚤負聲譽能篆
著復古糾繆編傳世行草宗晉人而不純熟

孫公亮渾源人世業造甲元初授諸路工匠總管公亮少有
志練習國典後拜監察御史累官江西等處行工部尚書

致仕

朱好古襄陵人善畫山水人物與同邑張茂卿暢雲瑞俱以
畫名家人得之若拱璧號襄陵三畫

王翼陽城人穎悟強記旁通律曆尤工詩因染疾棄進士業
精求醫術療人多奇驗著素問注疑難傷寒歌括若干卷
算術一卷詩五百篇

秦邦紀壺關人號雲岑子至元間以善畫賜官待詔嘗畫五
龍廟牧鶴圖見明四輔杜敷序

呂義字伯宜平定州人善易學尤精卜筮堪輿星曆諸術勅
授晉寧路教授子豫有父風世其業授饒州路陰陽學教
授

孫固太平人號古真道人始誕時姑射山草木不生者三年
長于儒術兼精閩法百工技藝無所不通人稱為百會先
生

梁周泰字白亨元至正間授平陽路醫學教授子權孫叔東
皆世其業人稱其有濟人功

李肯堂高平人巧思強記善楷書及篆籀之學有西溪法帖
傳世

魏文昌壺關人元季入神宇見梁端有書取視則風雲變色持歸鑿地窖肄習之遂盡遁甲覆射之術嘗被逮剪紙爲兔鋤禾雜沓競逐得脫川有桑掛其冠昌手拔殆盡迄今其地無桑云

彭舜安字國寶崞縣人世業醫頗通儒書自號西林翁延齡羽化葬於壓師坡下後里人多見之又傳椒寢有疾遣使召之遇諸塗旣愈辭歸詔賚其家則歿已數年矣因立廟刻石以紀云

明

韓昌洪洞人家世業醫有陰德時見推車者仆道診視知寒移暖室藥之汗愈及行資以米洪武初避兵岳陽山中遇異人授秘術不俟診視一見卽知人生死孫肅七歲誤吞

鐵釘舉家惶遽昌曰勿憂三年後釘當出他日且生貴子後釘果從脇下出已乃生忠定云

申九寧屯留人精天文數學洪武初授五官挈壺能逆占吉凶上召問應對如響

白能嵐縣人通書史雅善丹青永樂間詔至闕下上覽畫深賞之賜冠帶以寵異焉

王順胡良保德州人善繪事永樂時建太廟徵天下繪士詣京師良順偕往繪畢成祖往視以手撫順肩稱賞不置仍命繡御手於肩焉

馬繪安邑人精陰陽術永樂七年以薦辟授禮科給事中終欽天監監副

仝寅安邑人少瞽性聰警學京房易占斷多奇中英宗北狩

陰遣太監裴當問之寅筮得乾之初九附奏曰龍君象也
四初之應也龍潛躍必以秋應以壬午浹歲而更龍變化
之物也庚者更也庚午秋車駕其還乎還則必幽或躍應
焉後七八年必復辟午火德之正也丁者壬之合也其歲
丁丑月壬寅日壬午乎既而也先復入寇石亨召問休咎
寅筮之曰無能爲也且彼氣已驕戰必克果敗去及英宗
還居南宮指揮盧忠上變妄言請寅筮之寅叱以大義曰
是大凶兆忠大懼佯爲風狀後英宗復位授錦衣衛百戶
子孫世襲

武璫字大器介休人性聰敏母久病乃之抱腹巖研究內難
諸書三年以脉訣未真遠遊參得異人傳治病按脉決生
死若神遇危症出巧思治之沉疴立起璫嘗戒子孫非甚

明理勿輕學醫云

呂瑛義裔孫精醫道爲醫學典科天順間召入侍御藥局名
動中外後請告卒於家

陳璉字宗器稷山人繪山水諸科胥極精妙成化中繇布政
司都吏除金吾右衛指揮使經歷陞趙州判官子嶂孫桂
能世其業

喬莊簡公樂平人能爲四體書而隸筆尤佳今西北諸名山
多存詩記題名

李良貴字廷爵孟縣人祖福全本農遇異人授以鍛鍊雲根
之術且曰爾後世子孫必致位公卿父鎮繼役營建有勞
官文思院大使母陳氏感異夢而生良貴性穎悟通經史
正德甲戌授文思院副使嘉靖間轉營繕所所副建大工

屢蒙賞賚歷陞中憲大夫晉嘉議大夫通政使疾卒殯承天之郵舍有司辦棺衾繇驛歸里賜祭葬

王敦聞喜人偉幹修容能詩弘治間以天文授欽天監臺官與當時名公倡和胥推重焉

梁承齋稷山人大書二尺以上最有名小行草踈爽不密而無俗氣

宋銓潞州人嘗遇異人授秘方嘉靖八年郡別駕傅必用夜宴德風亭醉墮折左股衆醫莫能治銓出藥三粒大如豆啖之骨尋續有聲更以手熨起行如常一時稱神

萬瑄潞州人通元理善畫寫意胥入神年九十猶作小景見王公長揖不拜人皆重之

溫徽介休人知府廉之子嫻於彈弓流賊寇城徽發三彈中

三賊之目賊駭解去又善琴棋書畫寫竹尤工

杜纘字字公甫陽曲人幼補弟子員得羸疾因治岐黃家言以意自藥凡八年而病愈間療人疾他醫謝伎窮宇多以奇收之邑人王道行邁危疾宇投劑十餘有起色謂宜靜攝王不戒忽嘔痰數升營脫脉代太谿絕指下宇曰代脉有暴損者可治戒勿飲食日夜進附子獨參湯又爲灸靈天樞氣海關元諸穴百餘壯脉始得還凡服參盡十觔附子八兩有奇不雜他藥一銖百餘日而愈或云附子毒宇笑曰附纜二十分之一而以參制之毒將焉施蓋用附以直達湧泉健參力下行譬如命大夫頤指賊曹捕誅不道若嫌其猛利是偵卒游徼無所用而爪牙可廢也聞者胥服然宇品殊介雅不欲以醫見巡撫魏允貞母病或以宇

薦宇固謝不往魏屏侍從詣室跪請乃行病愈魏出諸醫方視之宇指一方曰此與愚意同但愚必百劑乃克痊公求效太速彼一投不效卽斥矣公可以酬某者酬之魏益加敬後以明經授兗州府別駕

王文端公家屏善楷書在翰林時神宗甚愛重之嘗命諸講臣書扇公書訖誤用私印竄滅其跡上問故諭復用私印而手擇十扇獨畀家屏書凡答客札無慮數千百字筆不少懈盈楮嚴毅對之令人生敬

楊炳字文彪蒲州人精醫術決人生死不爽嘗赴安邑宿逆旅一少年欲試之從窗牖躍入僵臥牀上呻吟求救炳診視大驚曰郎君殆將不起左右皆竊笑是夕少年果死或問其故曰腸已裂不可復治也其後世多習醫州人稱爲

藥丸楊氏崇禎間侍郎李立祠州城東門

高應元太原人行草書奇逸飛動而署書尤絕今存縣北甕城暨古城寺懸鏡中天便是西天二署

韓醫婦介休人以醫術遊四方孝義令周祐母患噎湯勺不入口奄奄垂盡聞韓婦治噎有奇術僕馬迎之至以花椒煮水令屢漱之出一白石長三寸許六稜而末銳隱隱紅紋如線納之口中令咽其液數以指摩搯咽喉外用箸探吻喀喀然出一肉片卷之狀若虬能蜿蜒動婦言噎人者其物有二一居喉一居心坎仍治如前法復出一物隨呼麵茶食之三日而起贈以絹錢及所乘馬婦取錢餘謝弗受周令爲刻石以志之

朱表抄字竹溪陽曲榮靖王曾孫好讀秦漢以上書工詩賦

善草書少子知鰲能世其家學

劉居仁字元儒號雲谷山人善篆隸篆刻尤絕叅政傅霖嘗館

陳魯高平人少學易入五臺見老翁授開心符魯跪吞之遂明卜筮陰陽九宮兵法風雨無不立應

王友古高平人博物洽聞尤精天文及九章法且布算而知人之隱嘗集渾天欹器銅鳥漏刻候風諸巧製并圖之以爲準

申相長治人業岐黃研究脉理尤精傷寒一科著診家秘要傷寒捷法歌稱良醫云

張英平陽人幼穎悟不事師傅善畫人物翎毛尤工戲墨號平水翁有編集畫譜行世平陽知府樊瑩有溪山不減王

摩詰臺閣無慚董伯仁之句

楊文昭字震寰蒲州諸生屢試不售隱於藝嘗以梅檀作佛像宛如生人遊京師諸貴人多招致之楊昂藏自負恥於干謁其所交皆一時名彥最著者如韓少師曠呂尚書惟祺錢尚書謙益曹中丞于沐程布衣嘉燧而於錢程稱莫逆今錢集中約震寰遊吳程集中贈蒲州楊生稱磊落奇男子者皆謂文昭也

王復丸絳州人善草書莊烈帝甚賞之謂有北人勁氣嘗下御帖令草數幅以進

翟師程襄陵邑諸生善書不撫前人筆法而自成一家更精畫龍虎山水人物亦不蹈尋常蹊徑

郭世元潞安人書畫胥絕沈平度令藍田延世元臨摩詰輞

川圖雲林山水臺榭人物毫髮絲縷備極工巧晚年宗巨然潑墨更爲蒼潤識者競珍賞之書撫聖教黃庭才思亦敏有遺賦百二十篇

李春先雲中世醫精研脉理全活多人時呼爲李仙

穆香郎嵐縣人生有道術樓居嘗有言談聲及視之無所見能用鐵點金年三十而逝

國朝

王适字古弦陽曲人偉幹修髯善飲酒終日夜不醉工墨畫初宗韶秀晚彌雄蒼

三銅道人不知何許人諸生成周佐母病喉百藥罔效一道人過門索蔬具見之曰喉有祟吾爲手療否且殆矣擊所持棕扇柄出紅丸七令吞之又彈頂後吐數肉蛾蠕蠕動

旋納之袖中語周佐謝我銅三斤足矣取以付再出失道人所在殆非世人也遂著三銅道人傳傳諸人周佐才而有義聲高平畢振姬與之友

趙文徵字鳳伯順治時貢士善畫山水空絕依傍奇古自成一體間題小詩亦清老可觀

吳燧號芝田臨汾人善書邑關帝廟春秋樓三大字高丈餘燧醉後縛帚爲筆信手揮成墨瀋淋漓識者疑有神助

趙興運滎河人性恬雅不喜紛囂通天文望氣占風六壬奇門諸數順治初偶語儕輩曰某夜觀天象執法星北流會巡按劉達私出適廁其側聞之愕然

衛侶瑗曲沃人精醫術於脉尤精決人生死如響友人劉玉生方娶婦侶瑗曰是女有病吾當診其脉五年後當不起

山西通志 卷一百六十一
後五年果卒著家傳纂要鍼灸全書兩書賈舍人荆生爲序以徐秋夫稱之

曹鶴徵絳縣人遇異人授鍼法沉疴宿疾應鍼而起四方至者戶外屢常滿年九十有八歲神彌旺

孟必達字泰交沁州人善六壬數有以失物叩之者必達曰此四足物非牛非犬當爲猫其人笑曰是也必達曰向東南求之得矣如其言果得猫州牧汪宗魯子歸江南愆期不至汪憂之召問必達曰此蓋問行人也卽至矣汪方在疑似間必達又曰巳入北門矣汪益疑之言未巳子果至繞道京師果入自北門也汪以爲神顏其間曰前知

山西通志卷第一百六十一



